

## DÎVÂN-I HAMDÎ ÇELEBÎ

### 1

1. Egerçi bendeye vâcib durur senâ-yı Hudâ  
Senâyı zâtına lâyıq Hudâ kılur ammâ
2. Ne bile hazret-i lâhûtı ‘akl-ı nâsûtî  
Ne göre neyyir-i a’lâyı dîde-i a’mâ
3. Nedendür irmez ana ‘akl u hissün idrâki  
Cemâli nûrına müstagrak iken arz u semâ
4. Ne zâhir ol ki anun perdesi kemâl-i zuhûr  
Ne bâtın ol ki anunla bulur zuhûr eşyâ
5. Cemâli nûrını kâşif yine celâli anun  
Dem-i vusûline mûsıl tarîk-i fakr u fenâ
6. Ne fakr olur bu ki gâyet ana gınâ oldı  
Nice fenâ bu fenâ kim cezâdur ana bekâ
7. Kanı gönül ki bile sırr-i lâ-yı tevhîdi  
Vücûdı mahv ider ol iki başlu ejderhâ
8. Bu resm-i sûreti ifnâ iderdi bir demde  
Meded yitürmese tiryâk-i ma’nî-i illâ
9. Ahad o kim sıfat-ı vahdet ana zâtîdür  
Ebed o kim ezeli ana na’t-ı ‘izz ü gınâ
10. Niteki fahrı durur mümkünün nihâyet-i fakr  
Cenâb-ı vâcibe ‘izzet kemâl-i istignâ
11. Deniyy-i zillate bayık dunüvv-i hâl-i ‘adem  
Veliyy-i ‘izzete lâ’ik ‘ulüvv-i isti’lâ
12. Dilâ menâzil-i ‘irfân-ı Hakk`a eyle sefer  
Ki tekyegâhun ola tâk-ı mülk-i “lâ-yefnâ”
13. Murâd odur bu harâbı ‘imâret itmekden  
Ki anda irişe gencîne-i Hudâya gedâ
14. Celâli burka’ın açup cemâl ‘arz ideli  
Cihânda olmadı kem ‘ışk u şûriş ü gavgâ
15. Emîr-i ‘âlem olup hükm ider şu ‘âşık kim  
Esîr idüp anı sultân-ı ‘ışk urur tamgâ

16. Muhibbe âteş-i 'ışkıdur anun âb-ı hayât  
Mürîde kıssa-i vaslı hikâyet-i 'ankâ
17. Vücûdı 'ırkını kat' itmeyince agyârun  
Olur mı vuslat-ı küllî cenâbına kellâ
18. Ne denlü da'vî-i 'irfân kılursan ey sûfî  
Yüzün karasıdur ancak başunda bu sevdâ
19. Nedür şerî'ati anun şerî'at-i 'ulyâ  
Nedür tarîkati anun tarîkat-i müslâ
20. Hakîkate nazar itsen anun hikâyetidür  
Kamu mezâhib içinde mesâ'il-i şettâ
21. Vücûdı vâcib anun "fa'lem innehu" vâhid  
Delîl ister isen "fe'stemi' limâ-yûhâ"
22. Sıfâtı kâmil anun cümle fi'l anun fi'li  
Yaratdı halk idiser halkı "târeten uhrâ"
23. Kazâsına ne kadar mahlas ister ise beşer  
Hezâr 'acz ile olur anun makâmı rızâ
24. 'Înâyeti işigin yasdanur gedâ Hamdî  
Dilinde tîr-i belâ vü başında tûg-i kazâ
25. Kemâli 'acz ü mecâli muhâl tâkati tak  
Ziyân-mâye olup hâli kâli yâ esefâ
26. Fakîr ü bende vü üftâde 'âciz ü 'âsî  
Öelîl ü hor u hakîr esîr-i bend-i belâ
27. Çün ihtitâma irer i'tisâm-ı hablu'llâh  
Ölince rişte-i ümmîdi kesmezem kat'â

## 2

### **medhü'n-nebî (s.a.v)**

1. *Yâ sahîbe 'ş-şefâ'a ve'l-havz u ve'l-livâ  
Entellezî tula'la' ke'l-bedri fi'd-düçâ*
2. *Yâ satvete'l-verâ bi-sıfâtin safiyetin  
Entellezî semâ bi-esâmîhi ke's-semâ*
3. *Subhu'l-yakînü dâ'i bi-envâri hüccetin  
İz kad celâ cemâlük min-maşrîku'l-hüdâ*

4. Yâ Rab ne resme medh idem anı ki fazl ile  
Mahmûd-ı enbiyâdur u maksûd-ı evliyâ
5. Tûmâr-ı medh-i Hâtem`i tayy itse tan mı ol  
Ser-nâme-i mürüvvet ü ser-defter-i sehâ
6. Cümle zer olsa ‘aynına gelmezdi kâyinât  
Sükker olursa ‘âleme kılmazdı iştihâ
7. Kurs-ı mehi felekde iki pâre eyleyen  
Arpa külîçesin özine eyledi gızâ
8. Geh yarı kandi ile niçe yârı kandurur  
Geh kahrı bendi ile kılur düşmene belâ
9. Lâli gehî fasîh ider ol geh fasîhi lâl  
Dâyı gehîdevâ ider ol geh devâyı dâ
10. Görmekde tan mı ana bir olursa pîş ü pes  
Çün oldı başdan ayaga câm-ı cihân-nümâ
11. Ey revnak-ı cemâl-i mehâbîb-i Zü`l-celâl  
V’ey şu’le-i çerâg-ı mehârîb-i enbiyâ
12. Çün cevher-i latîf durur cân gibi tenün  
Turfa degül tapuna eger sâye olmaya
13. Hakkâ senün gibi dahı ferzâne gelmedi  
Nat’-ı zemîni bast ideli kudret-i Hudâ
14. Esrâr-ı üns-i leyle-i esrâ senün durur  
Bu sohbetün safâsına irmedi asfiyâ
15. Tâc olsa tan mı ümmetüne “hayre ümmeten”  
Oldı çü milletüne kabâ hil’at-i bekâ
16. İrmedi seyr-i sırruna ‘azm-i “ulü’l-azim”  
Olmadı müntehâ bu makâma “ulü’n-nühâ”
17. Ey “lev-denevtü enmiletên lâ-hatraktu” dir  
Rûh-ı mukaddes anda ki cismüne oldı câ
18. Ey süllem-i ‘urûcuna nüh pâyê nüh felek  
V’ey şem’-i kadrüne yidi seyyâre pür-ziyâ
19. Tâ kim teneffüs eyledi subh-ı risâletün  
Gülzâr-ı ‘âlem oldı bu bûy ile hoş-hevâ
20. Cûdun cenâbı cânibinün ecnebîsidür  
Kim sây-ı Sûmenâta tutar rûy-ı ilticâ

21. Ebtâl eli yıkar salavât u savâmi’i  
Hak dînünün mesâcidine uralı binâ
22. İrerse âsmâna dahı düşmenün seri  
Şakk eyleye kamer gibi bir barmagun şehâ
23. Kesr oldı kasr-ı Kısırî vü râm oldı Rûm u Şâm  
Yesrib'de tâ ki feth ile nasb eyledün livâ
24. Hâb-ı hevâda kaldı sana iftirâ iden  
Hakkında Hak anun didi “hâbe men efterâ”
25. Yandı hased odına vü bilmedi kadrüni  
Bu cehl ile hasûda olur bu leheb sezâ
26. “Mâ-yentakû” kilîdi durur nutk-ı müdde’î  
“Mâ-yedde’î hilâfüke illâ ani’l-hevâ”
27. Sûsen gibi zebân uzadan nûr-ı ravzana  
Nergis gibi meger gözine irmedi ziyâ
28. Ey gerd-i râhı âb-ı ruh-ı ferş-i zi`l-bahâ  
V`ey hâk-i pâyı tâc-ı ser-i ‘arş-ı zi`l-’ulâ
29. Sünbül saçunla lâle ‘izârun yemînidür  
Kur’ân içinde âyet-i ve'l-leyli ve'd-duhâ
30. Gül lutfını meger yüzüne nisbet eyledi  
Kim yüzler anı derhem idüp nesme-i sabâ
31. Yüz karası bilür sanemün zülf ü hâlini  
Her kim saçun hevâsı ile oldı âşinâ
32. Bâzâr-ı kevne toldı ma’ârif fevâkihi  
Şer’ün dirahtı bulalıdan neşv ile nemâ
33. Gevher saçar kenâra icâbet denizleri  
Çün leblerüni depredüben kılasın du’â
34. İrer nişânesine hevân ile ok gibi  
Yolunda her ki pâyı anun âhenîn ola
35. Ârestedür hemîşe ni’âl-i kemâl ile  
Anlar ki oldı Düldül-i kadrüne çâr pâ
36. Ne çâr çâr ‘unsurı şer’ün mizâcınun  
Nâ-çâr olur olara kılan çûn ile çirâ
37. Bununbirisi hazret-i Sıddîk idi kim ol

Su gibi oldu sıdkıyile pâk ü pür-safâ

38. Bu yâr-ı gârunun kim irer medhi gavrına  
Sen ‘akl-ı evvelün kim ider sânisin senâ
39. Biri ‘Ömer durur ki debûr-ı şecâ’ati  
Müdbirlerün vücûdı tozın eyledi hebâ
40. Oldur ‘Ömer ki turra ile bir işâreti  
ëarbeyle atdı kayseri kasrından aşaga
41. ‘Osmân durur biri ki felek-rif’at idi ol  
Şemseyn-i ezhereynüni yâr eyledün ana
42. Hâk anlar idi kendüyi bu irtifâ’ ile  
Ol menba’-ı tevâzu’ u ol ma’den-i hayâ
43. Haydar durur biri ki ‘adû leşkerinde ol  
Bir âteş idi düşdi neyistâna gûyiyâ
44. ‘Uzzâya tâbi’ olanun işi ‘azâyidi  
‘Azm itse rezme heybet ile kasd idüp gazâ
45. Anlar ki mâh u mihr idi çerh-ı nübüvvete  
‘Ayneyn iken tapuna ‘aceb çekdiler ‘anâ
46. Zehr ile virdi sıhhat-i şîrîni çün Hasan  
Oldı şehâdet ile anun derdine şifâ
47. Sabr-ı dil-i Hüseyni görün Kerbelâ`da kim  
Cân virdi teşne-leb dimedi [hîç] bu kerbe lâ
48. Her dem sana vü âlüne ashâbuna selâm  
“Mâ habbete’r-riyâzu ve mâ hebbete’s-safâ”
49. Ey hulk ile ‘azîm olan u zât ile kerîm  
Sen şehden umaram ide meddâhına ‘atâ
50. Bîçâre musrîf ise nisâb-ı şefâ’ate  
Yok bu nasîbe Hamdî gibi müflis ü gedâ
51. Ehl-i dalâle emr olıcak imtiyâz ile  
Lutfundan umaram kim olam ehl-i ihtidâ
52. Bu cürm-i bî-kerânuma dermân tapundadur  
Lutf u şefâ’atüne çü yok hadd ü intihâ

### 3

1. Âh kim vardı ele girmede bir yâr-ı vefâ  
Münhedim oldu bu devr içre meger dâr-ı vefâ
2. Toldı mûr-ı tama' ile kamu enbân-ı kerem  
Oldı pür mâr-ı cefâ havlî-i gülzâr-ı vefâ
3. Ben vefâ ummadugum ehl-i küdüretden o kim  
Pîşe-i ehl-i safâdur bilürem kâr-ı vefâ
4. Râzıyam cân ile ol munsıfun insâfına kim  
İtmeye cevri ü cefâ kılmayıcak bârî vefâ
5. Kanı dil-ber ki behâ cevherini 'arza kılup  
Müşterî şevkıyla germ ola bâzâr-ı vefâ
6. Mâr-ı pîçidedür ol zülf-i müca''ad ey dil  
Sen sanursın bu cefâ-pîşeyi tûmâr-ı vefâ
7. ââlibâ kâleb-i Hamdî olalı merkez-i rûh  
Gelmedi dâ'iresine dahı pergâr-ı vefâ

### 4

1. Ey zülf-i kamer-pûşı "ve'l-leyli izâ yagşâ"  
Gün gibi tecellî kıl tâ gaşy ola her eşyâ
2. Sözüñ bedeli ahlâ şekker ola mı hergiz  
Yüzün gibi müstesnâ dil-ber ola mı hâşâ
3. Hüsnün güline me'vâ ger cennet ola tahsîn  
Sidre boyuna Tûbâ ger sâye ola tûbâ
4. Zülfün gamını çeksün la'lüni seven 'âşık  
Sabr itdi duhânına her kim ki sever halvâ
5. Cân virmiş iken Hamdî dildârı firâkında  
Kesmedi temennâsın vaslından anun kat'â

### 5

1. Yâ Rab görem mi ol mehi kim mihrbân ola

Râm ola ben garîbe vü ârâm-ı cân ola

2. Her dem sa'âdet atına ol bendedür süvâr  
Kim pâdişâhı anun ile hem-'inân ola
3. Ey dost kahr-ı 'ışkun ile bî-nişân olan  
Lâ'ik durur ki gamzen okına nişân ola
4. Cevr ü cefâ vü derd ile oldı tenüm nizâr  
Kûyun itine hoşdur eger üstühân ola
5. Gûş eylesün lebün haberin Hamdîden 'ıyân  
Her kim dilerse vâkıf-ı sırr-ı nihân ola

## 6

1. Tâ ki virdüm gönlümi cânâ sana  
Gitdi 'aklum kalmışam şeydâ sana
2. Bend-i zülfün görelî meyl eylemez  
Gönlümün dîvânesi illâ sana
3. Derd-i dil-ber mübtelâlar honıdur  
Besdür ey sûfî gam-ı halvâ sana
4. Hem-ser oldun dil-rübâlar zülfine  
Eksük olmaz ey gönül gavgâ sana
5. Nakd-i vakti gözle Hamdî 'ârif ol  
Assı kılmaz gussa-i ferdâ sana

## 7

1. Ol demde kim muhibbine dil-ber nidâ kıla  
'Âşık gerek ki cân u cihânı fidâ kıla
2. 'İşkunmarîzinün o kişidür tabîbi kim  
Derdi ana devâ vü belâyı gızâ kıla
3. Lutf ile açsa gül gibi dil-ber yakasını  
Pîrâhenini niçe garîbün kabâ kıla
4. Lutf eyle sâkî bâdeyi bizden ayırma kim  
Bu kalb-i pür-küdûreti şâyed safâ kıla
5. El götürüp du'âsı budur haste Hamdînün

Kim dil-berün cemâline karşı du'â kıla

8

1. Kaçan ki şâhid-i evvel yüzinden açdı nikâb  
Cihânı pertev-i hüsninden eyledi pürtâb
2. *Zi-mîve-i gam-ı û iştihâ-yı haste-dilân*  
*Ve-mâ lehüm tarabun bi'n-nahîlü ve'l-a'nâb*
3. Yüzinden aldı ziyâ dîde-i "ulü'l-ebâr"  
Sözinde buldı safâ sine-i "ulü'l-elbâb"
4. Muhibbi âyeti "tûbî lehüm ve hüsne me'âb"  
'Adûsı gâyeti "kad kezzebû fe-hakke ikâb"
5. *Merebtü cenbüke yâ Rabbi min-hatî'âtî*  
*Talebtü vechüke yâ men ileyhi külli me'âb*
6. Çeküp tarîka-i Hakka keşân keşân iledür  
Ne kalbe kim ura dest-i 'inâyetün kullâb
7. Şeh-i cihândur o kim oldı sana "ni'mel-abd"  
'Alemdür ana dü 'âlemde "innehû evvâb"
8. Simâ'-ı meclis-i 'ışkun ne zevk olur ey dost  
Ki kadd ü sine-i 'âşıkdur ana çeng ü rebâb
9. Dil-i mutahhar-ı 'âşık ki bâg-ı bezmündür  
Anı 'imâret için devr ider bu nüh dülâb
10. Bitürdün Eymen-i dilde dıraht-ı îmânı  
Ki göre Mûsî-i cân 'ışk odından anda şihâb
12. Yu âb-ı tevbe ile Hamdî sine mişkâtın  
Tolar zücâcene envâr-ı hazret-i Tevvâb
13. İçüp şarâb-ı hakîkî mecâzı terk eyle  
Bilürsin olmadı kimse serâb ile sırâb

9

**velehu fî-medhi'n-nebî (s.a.v)**

1. *Yâ emlahe'l-beriyye yâ efsahe'l-Arab*  
*Entellezî tefferrede bi'l-ilmi ve'ledeb*
2. *Zât-ı to genc-i muğlak u fettâh-ı vey Hudâ*



*Rûh-ı to asl-ı mutlak u ervâh ez-û şu'ab*

3. 'Âşıklara yüzün nazarı farz-ı 'ayndur  
Zâhidlere egerçi bu hâl oldu müstehab
4. 'İşkun odına yansa 'aceb mi bilür seni  
Ol dem ki düşmenün ola "hammâlete'l-hatab"
5. *Yâ ahsene's-şemâ'il bi'n-nûri ve'z-ziyâ*  
*Yâ seyyide'l-kabâ'il bi'l-asli ve'n-neseb*
6. Çün Mustafâ dinildi lakab zât-ı pâküne  
Bildüm ki cümle 'âleme gökden iner lakab
7. Tan mı disem vücûduna fahr-ı ta'ayyünât  
Çünkü zuhûr-ı 'âleme zâtun durur sebab
8. Rahmân çü hazretüne rahîm ü ra'ûf dir  
Hoşdur dinilse sana bu vasf ile lutf-ı Rab
9. Ger 'adl ü şer'un olmasa dil-ber saçı gibi  
Ser tâ-kadem tolardı cihân fitne vü şagab
10. Kat' itmesen delâ'il ile şübhe 'ırkını  
Bâzû-yı dîne gelmez idi kuvvet-i gazab
11. Ol nüshadur tapun ki risâlet cerîdesi  
Anı beyân hakkıçün olmuşdı müntehab
12. Zülf ü ruhun hayâli anun kim dilindedür  
'Îd u berât olursa ana tan mı rûz u şeb
13. 'Aşkun şarâbıyla beni mest eyledi  
'Unnâb-ı leblerün yaradan hâliku'l-'ineb
14. *Ey her sahâbe-i to sehâb-ı mükerreremend*  
*Mevhûb şod fezâ'il-i îşân ne mükteseb*
15. Feyyâz iken dü 'âleme cûdun bulıtları  
Hamdîyem ummazam ki kalam [böyle] teşne-leb

**10**

1. *Tâ key ey dil hevâ-yı genc-i harâb*  
*Dür-i deryâ-yı ma'rifet der-yâb*
2. Geç bu lezzât-ı i'tibârîden

Kimse olmaz serâb ile sîr-âb

3. *Utibu' esveten ilâ ümemin*  
*Kîlü tûbî lehüm ve hüsne me'âb*
4. Zehr olur fürkatile olsa zülâl  
‘Azâb olur vuslatile olsa ‘azâb
5. Hayme kurmuşdı dilde leşker-i gam  
‘Âleme gelmedin bu çetr ü tınâb
6. Nûş-ı câm-ı şarâb-ı gaflet ile  
Âh kim geçdi nev-bahâr-ı şebâb
7. Hamdî depred ümîd halkasını  
Tâ olunca hitâbı “men fi’l-bâb”

## 11

1. Âh kim vaslın nasîb itmez habîb  
Gerçi direm gice gündüz yâ nasîb
2. Derd-i dil-berdür bizüm dermânumuz  
Zahmet olur gelme lutf eyle tabîb
3. Var mıdur bir dem ki dilden geçmeye  
Hançer-i gamzen hayâli ey habîb
4. Ben virüp varum alurdum cânını  
Ger satılsa fi’l-mesel cân-ı rakîb
5. Hamdî hâmûş olma elhân vaktidür  
Devr-i güldür cûşa gel ey ‘andelîb

## 12

1. Hâtır-ı yâra tokınmış kakımış ol it rakîb  
Kakıyup taş talasa kelb-i ‘akûr olmaz ‘acîb
2. Dermend-i derd-i yâram bana ol dermân yiter  
Cân alıcı görünür gözüme cânâ her tabîb
3. Bülbülü gördüm katında sûsenün elhân ider  
Sanasın kim tîgını koltugına almış hatîb
4. Acır ise sûfî kendü tâli’ine acısun  
Kim ana halvâ bana dil-ber lebi oldu nasîb

5. Hamdî miskîn zülf-i yârı kendünün sanmış meger  
Dün garîbündür didüklerin işitmiş ol garîb

### 13

#### velehu fî-medhi'n-nebî (s.a.v)

1. *Ey şehenşâh-ı serâ-perde-i esmâ vü sıfât*  
*Nazar-ı ehl-i nazar zât-ı torâ der-heme zât*
2. *Zi-to garrâ heme kevn ü to mu'arrâ zi-mekân*  
*Be-to pür-nûr cihât u to münezzeh zi-cihât*
3. *Key resed in dil-i dermânde be-elvân-ı senât*  
*Mânde der-pâye-i ihsâ heme ehl-i derecât*
4. Çâh-ı cehlün derekâtında sükûn eylediler  
Evc-i idrâküne irmege kılanlar harekât
5. *Bî-nişânîst nişân-ı dil-i erbâb-ı gamet*  
*Bî-sıfâtîst sıfât-ı heme ashâb-ı safât*
6. *Yek dem-i vasl-ı to bihter zi-ibâdât-ı sinîn*  
*Yek nazar hüsn-i torâ bih zi-ulûf-ı hasenât*
7. Hamdî tahsîn o hümâyâ ki varup sâye sala  
O makâma ki yakar Rûh-ı kudüs anda kanat

### 14

1. Safâ virür gönüle medh-i ekmelü`s-sâdât  
“Ale'l-habîbu minallâhi efdali`s-salavât”
2. Hudâ kelâmı ki ta'rîf ider kemâlin anun  
Ne resme medh idem anı bu hadd ile heyhât
3. Şe'â'irin nice şerh ide bir niçe eş'âr  
Menâkıbın nice vasf ide bir niçe ebyât
4. Şirâ'ı olmasa şer'i felâh zevrakınun  
Kimesne bahr-ı hatâdan bulımaz idi necât
5. Götürdi çünkü nikâbını “kâbe kavseyn”ün

Görindi ‘ayn-ı dünüvv ile sırr-ı vahdet-i zât

6. Yüzinden olsa tecellî’aceb mi ‘uşşâka  
Çü kıldı zâtını Hak pâk vechine mir’ât
7. Du’âsı ref’ ide hayret belâsı tûfânın  
O dem ki Nûha varup bulmaya necât ‘usât
8. Urına efser-i nâz u geye libâs-ı niyâz  
Şefâ’at isteye andan kamu hufât u ‘urât
9. Bu kavli Hamdî mükerrer okı ki şekkerdür  
“Ale’l-habîbu minallâhi efdali’s-salavât”

### 15

1. *Elâ yâ men yüdirü’s-sâfiyâti*  
*İfz minhâ aleyne’l-bâkiyâti*
2. Sun ol sahbâyı kim nûş iden anı  
Unıdur bir kadehde şeş cihâtı
3. *Li-kad esmertı leylî ke’n-nahîli*  
*Ve işu’l-Kaysu min-binti’l-felâti*
4. Ne var öldükse halvâ-yı lebünden  
Unıtma cânun için bu rûfâtı
5. *Tecellî vechüke min-küllü şey’in*  
*Fe-şâhidnâhu fî-küllü’z-zevâti*
6. Senün mihrünsüz ey mâhum bulunmaz  
Ararsam zerre zerre kâ’inâtı
7. Nice âb-ı hayât olur lebün kim  
Gören ‘âşıklarun gider hayâtı
8. Kara zülfün karâr itmedi bir dem  
Dirîgâ yog imiş ‘ömrün sebâtı
9. Kaşun mihrâbına karşı yakaram  
Dil ü cândan düzüp iki berâtı
10. Lebün şevkında hâlüm yazmag için  
Tolar kan ile bu çeşmüm devâtı
11. İrag oldı tapundan Hamdî cânâ  
Yakîn oldı bu miskînün memâtı

## 16

1. Çekdi cân kasdına hañçer kâkül-i müşkîn-i dost  
Kıldı dil mülkin musahhar kâkül-i müşkîn-i dost
2. Yüz çevürmezdi cemâli mushafından dilberün  
Ger degülmissedydi kâfer kâkül-i müşkîn-i dost
3. âamzesi efsûnı te'sîr itmeğiçün 'âleme  
Âteş üzre saçdı 'anber kâkül-i müşkîn-i dost
4. Nesme-i bâd-ı sabâ esdükçe andan sakınup  
Kaddinün üstine ditrer kâkül-i müşkîn-i dost
5. Hamdî miskîn gör ferâgat mülkine sultân iken  
Eyledi zulm ile çâker kâkül-i müşkîn-i dost

## 17

1. Keşf ide mi cemâlini yârun kitâb-ı bahs  
Def' id bu şübheyi ki olupdur nikâbı bahs
2. Dîdârını safâyile 'ârif bilür hemân  
Câhil çeker bilem diyü anı 'azâb-ı bahs
3. Ol kim gözin açup göre nûr-ı cemâlini  
Bir zerredür katında hezâr âftâb-ı bahs
4. Esrâr-ı ehl-i sadra dahı vâkîf olmadı  
'Akl-ı beşer ki mevkîfidür bâb-ı bâb-ı bahs
5. Sîr-âb olursa Hamdî şarâb-ı yakîn ile  
Tahkîka ire kılmaya meyl-i serâb-ı bahs

## 18

1. Bu haste câna lebün sabr ile buyurdı 'ilâc  
'Aceb ol acıya katlana mı za'îf-mizâc
2. Şemîm-i sünbülüne kanda öykinür nâfe  
Benefş-i ter gibi olmaya müşk-i huşk-mizâc

3. Bana piyâle sun ey sâkî yâra ‘azm iderem  
Kitâb-ı hayruna yazsun melek sıkâye-i hâc
4. ‘Aceb ne kâfiledür kârbân-ı kûy-ı nigâr  
Ki cân virür bular ol yolda ‘ışk emîrine bâc
5. O haste-dil ki ölür hadd ü hâl derdiyile  
Gerek ki anun ola tâbûtı âbnûs ile ‘âc
6. Gönül vücûdını bâzâr-ı ‘ışka ‘arz eyler  
Kişi ki müflis ola gözlemez kesâd u revâc
7. Eger zekât-ı vefâya fakîr ister isen  
Cihânda Hamdîden özge bulunmaya muhtâc

## 19

1. Gün yüzün devrinde âh itmek eger olmasa suç  
Berk-ı âhumdan tolardı kubbe-i zâtü`l-bürûc
2. Yıkmağ olurdu felek burcını top-ı âh ile  
İlle sîne hânesi döymez eger kim olsa tuç
3. Çıkdı hattun leblerün devrinde kâfirlik ider  
‘Âdet oldur şîre vaktinde ider kâfir hurûc
4. İremezsın sûfî uçmagıla kûy-ı dil-bere  
Tâ’atundan şeh-per idinüp gerekse bin yıl uç
5. Dil-rübâlar zülfiyile devr elinden âh kim  
Ne anun cevrine had var ne bunun kahrına uç
6. Kaddile korkutmak ister Hamdî’yi ebleh rakîb  
Bilmez ol gâfil nicedür kıssa-i Mûsî vü ‘bc

## 20

1. Fevt oldı pend-i vâ’iz ile fırsat-ı sabûh  
Nâsıh sözünü dinlemeyem tevbe-i nasûh
2. Reyhânlar içre sâkî-i rûhânî şevkine  
Reyhânî bâde al ele kim râhat ola rûh
3. ‘Îsî gibi mücerred ol ey dil ki bulasın  
Bir sâ’atin ferâgatünün niçe ‘ömr-i Nûh

4. Yârun kitâb-ı hüsnini fehm idemez ‘ukûl  
Gerçi ki yazdılar ana erbâb-ı dil şürûh
5. Hamdîye karşı zülfi nikâbını feth ider  
Şehden ‘aceb mi bendesine ol kadar fütûh

## 21

1. Nâzûklig ile lu’b idüp ol yâr-ı lâle-ruh  
Şeh-mât itdi ‘aklumu kıldı havâle ruh
2. Teşbîh iderdi kâmet-i bâlâ-yı dil-bere  
Ger bâgbâmı gülden ideydi nihâle ruh
3. Bend itdi bende kıldı kara zülfine beni  
Âl ile ‘arz idüp yine ol gözi ala ruh
4. Hüsnine bende ola meh-i çâr-deh tamâm  
‘Arz eyler ise ol sanem-i heft-sâle ruh
5. Aldıysa Hamdînin nola ‘aklın şarâb-ı ‘ışk  
Çün ana nukl-i bûseyi virdi nevâle ruh

## 22

1. *Senâ-yı sîne-i mâ şu’le-i senâ-yı Ahad*  
*Ziyâ-i dîde-i mâ pertev-i likâ-yı Ahad*
2. Şular ki kulzüm-i vahdetde oldılar fânî  
Olara câm-ı “sekâhum” sunar bekâ-yı Ahad
3. Sadâ-yı na’ra ile tâk-ı ‘arşa lerze salar  
Anı ki cûşa getürdi mey-i safâ-yı Ahad
4. âulâmam ana ki dergâhına gulâm oldı  
Fidâyam ana ki cânın kılur fidâ-yı Ahad
5. Cihân içinde o cândur şeh-i serîr-i safâ  
Geçüp ‘atâ-yı Ahaddan ola gedâ-yı Ahad
6. Çemende bülbül-i miskîn ki âh u nâle kılur  
Şemîm-i gülde bulupdur meger hevâ-yı Ahad
7. Mecâzî anlasa Hamdî ‘aceb mi sözlerini  
Anun ki hâli degül nefy-i mâ-sivâ-yı Ahad

23

1. *Eger nevâ talebî ey dil ez-nevâl-i Muhammed  
Kul esselâmu ale'l-Mustafâ ve âl-i Muhammed*
2. *Sahâ'if-i dil ü cân ez kemâl-i û şode harfî  
Cihân-i dâ'ire-i nokta ez-cemâl-i Muhammed*
3. Yiridür olsa eger pâye 'arşa fark-ı melâ'ik  
Ki bunca rif'at ile oldı pây-mâl-i Muhammed
4. Günâhkâra mümidd ol olur kıyâmet olıncak  
Bu hâle dâl dur[ur] harf-i mîm ü dâl-i Muhammed
5. Hayât çesmesidür illenûr içinde revândur  
Ki Hızr-ı zinde kılur şâribin zülâl-i Muhammed
6. Düşürdi şâhları filden ruh üzre 'Acemde  
'Arabda 'arbedede na'ra-i cimâl-i Muhammed
7. Hümâ-yı devlet o dil murgıdur ki kıldı cihânda  
Şikâr-ı dâne vü dâm anı zülf ü hâl-i Muhammed
8. Dilerse Hamdî eger lezzet-i visâl-i Muhammed  
Gerek tarîki ola sünnet ü hisâl-i Muhammed

23

**kasîde-i belîga fi-medhi'n-nebî (s.a.v)**

I

1. Dil derdine devâdur hakkâ du'â-yı Ahmed  
Cân bezmine senâdur medh ü senâ-yı Ahmed
2. Geçdi iki cihânı üns oldı âşiyânı  
Ol 'âşıkun ki cânı oldı fidâ-yı Ahmed
3. Kesr oldı haclet ile a'lâmı her emîrün  
Nasb oldı nusret ile çün kim livâ-yı Ahmed
4. Mi'râc-ı enbiyâdur bir pâye 'izzetinden  
Ser-tâc-ı evliyâdur na'leyn-i pây-ı Ahmed
5. Ednâ habâbe iken deryâ-yı hikmet oldı  
Ol 'ârifün ki gönli toldı hevâ-yı Ahmed
6. *Yâ zümrete'l-usâtun hayyû ale's-salâtin  
Sallû ile'l-memâtin hayyû âle'n-necâtin*



## II

1. Ay ile gün felekde ‘aks-i rikâb-1 Ahmed  
Bunca şeref melekde ihsân-1 bâb-1 Ahmed
2. Kâl ile cümle kalbi pâk itdi kâli anun  
Feth itdi bâb-1 fazlı fasl-1 hitâb-1 Ahmed
3. Nûr-1 hidâyetiyle ‘âlem münevver oldu  
Ferr ile tâli’ oldu çün âfitâb-1 Ahmed
4. Bir pertevinde hüsni kevneyni nûr iderdi  
Ger olmasa arada ha’il nikâb-1 Ahmed
5. Çün menba’-1 şekerdür anun mübârek agzı  
Ashâba şerbet olsa tan mı lu’âb-1 Ahmed
6. *Yâ zümrete’l-usâtun hayyû ale’s-salâtin  
Sallû ile’l-memâtin hayyû âle’n-necâtin*

## III

1. Cûyende-i delîle besdür sirâc-1 Ahmed  
Şâfî yiter ‘alîle hakkâ ‘ilâc-1 Ahmed
2. Hikmet budur ki taht-1 ‘arşa şehenşeh iken  
Fakr u ‘anâ ‘abâ vü terk oldu tâc-1 Ahmed
3. İns ü firişte anun kadrine nice irsün  
Üns iledür sirişte çün kim mizâc-1 Ahmed
4. Yandı hased odına pervâne gibi düşmen  
Gün gibi rûşen oldu tâ kim sirâc-1 Ahmed
5. Kan olsun içer ise câm-1 Cemün şarâbın  
Ol câna kim olupdur mest-i zücâc-1 Ahmed
6. *Yâ zümrete’l-usâtun hayyû ale’s-salâtin  
Sallû ile’l-memâtin hayyû âle’n-necâtin*

## IV

1. Âyîne-i Hudâdur vech-i melîh-i Ahmed  
Nukl-i mey-i safâdur nakl-i sahîh-i Ahmed
2. Cümle fasîhe virdi bir noktası fazîhat  
Pür-nüktedür hakîkat kavlı-i fasîh-i Ahmed
3. Sultân-1 tâc-1 devlet hakan-1 taht-1 ‘izzet  
Tâbân-1 sûbh-1 rahmet vech-i sabîh-i Ahmed

4. Yâ Rab ne resme sıgsun bir kaç buhûr-ı nazma  
Deryâ-yı bî-kerândur çün kim medîh-i Ahmed
5. *Yâ zümrete 'l-usâtun hayyû ale 's-salâtin*  
*Sallû ile 'l-memâtin hayyû âle 'n-necâtin*

#### V

1. Hırz-ı emân enâma iz'ân-ı nâm-ı Ahmed  
Ümmîd-i hâs u 'âma in'âm-ı 'âm-ı Ahmed
2. Ehl-i risâlet içre çün bunda Mustafâdur  
Mahmûd olursa tan mı anda makâm-ı Ahmed
3. Efrâsyâb-demdir kemter gulâmı anun  
Cân milketinde Cemdir ser-mest-i câm-ı Ahmed
4. Sîmurg-ı devlet eyler 'âlemde himmetiyle  
Ol cân kuşın ki nâ-geh sayd itdi dâm-ı Ahmed
5. 'Âkildür ol kişi kim vird idinür dürûdın  
Dârü's-selâma iltür çün kim selâm-ı Ahmed
6. *Yâ zümrete 'l-usâtun hayyû ale 's-salâtin*  
*Sallû ile 'l-memâtin hayyû âle 'n-necâtin*

#### VI

1. Kevn ü mekâna sıgmaz çün taht-gâh-ı Ahmed  
Nice beyâna sıgsun evsâf-ı câh-ı Ahmed
2. Ruh döndürüp cedelden mât ola nice şehler  
Çün süre devlet atın hayl ü sipâh-ı Ahmed
3. Da'vî deminde bedri şakk itdüğü budur kim  
Kadr-i tamâma ire tâ kim güvâh-ı Ahmed
4. Şer'i tarîkatinde sâbit-kadem ol ey dil  
Bezm-i necâta iltür çün 'azm-i râh-ı Ahmed
5. Rûz-ı cezâda Hamdî ümmîdümüz budur kim  
Mahv ide bin günâhı bir dem nigâh-ı Ahmed
6. *Yâ zümrete 'l-usâtun hayyû ale 's-salâtin*  
*Sallû ile 'l-memâtin hayyû âle 'n-necâtin*

1. Ney gibi sensüz eylerem feryâd  
Bir nefes niçün itmedün beni yâd
2. Sîm-i hâlisden eyleyen tenüni  
Âh kim itdi gönlünü pûlâd
3. Ölü dirgürmede lebün ‘Îsî  
Diri öldürmede gözün cellâd
4. Gönlüm iklîmi ey perî-peyker  
Sensüz olursa olmasun âbâd
5. Yazmag için vidâd-nâmesini  
Dûd-ı âhından itdi Hamdî midâd

## 25

1. Yokdur dehânı gibi nigârun şeker lezîz  
Kanda olur lebi gibi helvâ-yı ter lezîz
2. Nâz u ‘itâb u cevri ile hoşdur tarîk-i ‘ışk  
Esbâb u ni’met ile olur çün sefer lezîz
3. Hoş gelse tan mı fitne vü âşûb gamzene  
âammâza ey perî çün olur şûr u şer lezîz
4. Cân mîvesine lezzeti şevk-i ruhun virür  
Hurşîd pertevinden olur çün semer lezîz
5. Devr-i ruhunda bulmadum uyhu halâvetin  
Gerçi kim olur âdeme hnâb-ı seher lezîz
6. Tâb-ı teb-i firâkun ile eyle hasteyem  
Ki zehr gibi acı gelür bana her lezîz
7. La’lün safâsı Hamdî`ye bir câm içürdi kim  
Cennet şarâbı ola meger ol kadar lezîz

## 26

1. Anun ki şükri gönül tûtîsine şekkerdür  
Senâsı şükr ana kim dilde uş mükerrerdür
2. Meşâm-ı câna irişür kohusu ‘ûd gibi  
Hevâsı âteşine her gönül ki micmerdür
3. Ne şehdür ol ki degülken ‘ubeydine muhtâc  
Hemîşe hon-ı sehâsıyla bende-perverdür

4. Şu cân kim oldı anun ‘ışkı dârına Mansûr  
Vücûd leşkerinün kahrına muzafferdür
5. Yürür matiyye-i nefsum yolunda sürçe düşe  
İrürse menzile tan mı tapun çü reh-berdür
6. ‘Aceb mi ‘azb olur ise ‘azâb-ı nâr-ı belâ  
Ana ki ‘ışkun odında dili semenderdür
7. Safâ-yı kalb ile şâd eyle Hamdî bendeni kim  
Küdûret-i gam ile hâli gey mükedderdür

## 27

1. Güneş yüzüngöriccek şerm idüp sehâba girür  
Ne vasfa sıgdı cemâlün ne hod kitâba girür
2. Tolar hevân ile sînem gönülde cûş olıcak  
Temevvüc eylese deryâ hevâ habâba girür
3. Cihâna ‘arz ider ol bî-vefâ güneş yüzini  
Belâlu ‘âşıkâ karşı niçün hicâba girür
4. Didüm hisâb ile cevr it didi bizüm ilde  
Ne nâza defter olur ne cefâ hisâba girür
5. Çıkarma yüz suyuyle hevâ odın elden  
Sana kalan odur ey Hamdî ten türâba girür

## 28

1. Yine gönülde heves bir nigâra olmuşdur  
Ki hüsni nakşı henûz âşikâre olmuşdur
2. Ne serv olur sanemâ kâmetün ki reşkinden  
Sanavberün yüregi pâre pâre olmuşdur
3. Ne turfa-tıynet imiş sîne-i rakîbün kim  
Hased odına yanup seng-i hâre olmuşdur
4. Ne lu’bet ile kılur raksı çerh-i gerdûn kim  
Gönül elinde anun çâr-pâre olmuşdur
5. Cihânda Hamdî kamu fahrı fakra tebdîl it  
Bu demde gerçi taleb iftihâra olmuşdur

## 29

1. Kahramânî bakışun kasd-ı dil ü cân eyler  
Âh kim hûnî gözün lahzada bin kan eyler
2. Ka'be yüzünde halflüm hacerü'l-esvedüni  
Gören öninde ölür kendüyi kurbân eyler
3. Ya'nî ol hâl-i siyeh-dâne ki şeh-dâne-i müşk  
Ana hindûsı olup kendüye sultân eyler
4. Agzuna bakmaga komaz beni tîr [e]yle atar  
Bir gün ol hûnî gözün yokyire [çok] kan eyler
5. Hamdî meydân-ı gama başını top itmiş idi  
Şimdi top kaddini devrân eli çevgân eyler

## 30

1. Niyâz eyledigümce nigâra nâzlanur  
Bilür yaraşur o serv ü çenâra nâzlanur
2. Cihânda bir yalunuz serv-i nâz-perverdür  
Baş egmeyüp feleke rûzgâra nâzlanur
3. Belâlu bülbülin ol gonca bir ağız sormaz  
Alup kenârına hârî hezâra nâzlanur
4. Rakîbe eyledi meyli kaçır gözümden o serv  
Yabana sâye salar çeşmesâra nâzlanur
5. Gönüllü pârs gibi hışm idici ala gözi  
Za'îf Hamdî gibi kem-şikâra nâzlanur

## 31

1. Cûş-ı sînem gözüme eşk-i firâvân getürür  
Nûh tennûrî gibi 'âleme tûfân getürür
2. Şem' bir yalın ışıkdur ana pervâneleri  
Kim çerâğın uyarur kimisi kurbân getürür
3. 'Anberîn hattı ki devr-i leb-i cânânda biter  
Gûyiyâ mürçe[dür] mühr-i Süleymân getürür
4. Âteşî-millet olan görse yüzün mushafını  
Şem' gibi götürüp barmagın îmân getürür

5. Hamdî miskîn kapuna geldi yüzün alup ele  
Nola göynüklü kulu şâhına za'frân götürür

### 32

1. Âfet-i fûrkat bu yıl halka belâ-yı 'âmdur  
Yanmazam andan il ile kara gün bayramdur
2. Dil ki dil-berden dehân ile miyân zevkın umar  
Ummasun ol kim bu hiç olmayacak ibrâmdur
3. Fûrkat-i zülfin gönül yanma hayâli geldi çün  
Ol kara gün kıssasın uzatma kim ahşamdur
4. Sünbül-i ter zülfüne il benzedürler 'anberi  
Aldanur bu puhteye miskîn ne katı hâmdur
5. Alkış itme Hamdîye fûrkatde tûl-i 'ömr ile  
'Âşıka yârinden ayru bu du'â düşünâmdur

### 33

1. Ol kalender-meşrebe âzâdelik erzânîdür  
Kim cihânun tâc u tahtı terkinün vîrânıdur
2. Kevser-i rûhânîlerden lezzet alan âdemî  
Çeşme-i hayvânı nitsün çeşme-i hayvânîdür
3. Ey niçe bin kan ider cellâdı çerhün her gice  
Her sehergeh al iden dâmânın anun kanıdur
4. Kârgâh-ı hazret-i a'lâya kim baka gönül  
Kim hakîkat ma'rifet bâzârı şehristânıdur
5. Aç gözün terk id 'amâyı dîde-i Ya'kûbvâr  
Her ne görsen ey 'azîz ol Yûsuf-ı Ken'ânîdür
6. Âferîn ol âfitâbun hüsnine kim zerresi  
Dil-ber-i Çîn ü Hitâ mahbûb-ı Türkistânîdür
7. Ehl-i ma'nâ olmayup 'âlemde sûret-bîn isen  
Niçe Mûsî sanduğın Fir'avnî vü Hâmânîdür
8. Ol safâ-efzâ çemende 'andelîb ol Hamdî kim  
Rûh-ı kerrûbî gül ü reyhânınun hayrânıdur

### 34

1. Bu 'ışk meşrebi yâ Rab ne turfa meşrebdür  
Ki hûn-ı dîde-i 'uşşâk ile leb-â-lebdür
2. Cihânı yıkdı cefâyile tıfl iken dil-ber  
Mu'allim ana meger nâz u şîve mektebdür
3. Yazarsam eşküm ile sûznâk olur nâme  
Meger ki dûdıyle âhumun mürekkebdür
4. Sözünden ayru bana telh olur [leb-i] şîrîn  
Yüzünden ayru şehâ rûzı 'ömrümün şebdür
5. 'Îlâc itmege sûfî riyâ marazlarına  
Eger devâ sorar isen kadeh mücerrebdür
6. 'Aceb mi Hamdî kılursa yezîd-i nefsi zebûn  
Ta'allukât-ı cihândan o kim müseyyebdür

### 35

1. Gönül ki bir sanemi kendüye nigâr eyler  
Anun belâlarını cândan ihtiyâr eyler
2. 'Aceb ne sihr ü füsûn bilür ol perî-peyker  
Ki zülfinün resenin yidi başlu mâr eyler
3. Gülün yiri diken olur çemende reşkinden  
Kaçan ki 'ârızını dil-ber âşkâr eyler
4. Boyına sehv ile öykünmiş idi serv-i sehî  
Ayagı üzre turup miskîn i'tizâr eyler
5. Nigâr zülfi gibi Hamdî bî-karâr oldı  
Sebeb bu kim heves-i bûse-i 'izâr eyler
6. áam ile kaddini ham kılmayan kemer gibi  
Miyânın ol sanemün sanma kim kenâr eyler

### 36

1. Her ehl-i dil ki bana o cândan haber virür  
Her bir haberde cân alur andan haber virür
2. Kanı bir ehl-i dil ki cinân zevkın eyleye  
Nev-rûz vakti irdi cinândan haber virür

3. Sâkî gam-ı cihânı dilersen ki süresin  
Meclis içinde koma cihândan haber virür
4. Cânumdan oyıvirdi\* lebün sorıcak seni  
Sad âferîn o câna ki cândan haber virür
5. Her kim sanavberi boyuna nisbet eyleye  
Koma katunda anı yabandan haber virür
6. Hûn-ı cigerde cân virenün sorma hâlini  
âark oldı kan denizine kandan haber virür
7. Gül gibi medh-i hüsnüni Hamdî varak varak  
Sûsen gibi hezâr zebândan haber virür

### 37

1. Hevâ-yı sünbülün ile sabâ ki hoş-demdür  
Deminde ‘azm-i remîme Mesîh-i Meryemdür
2. Saçun durur dil-i bî-çâreye hemîşe makâm  
âarîbe şehri-melâ’im sevâd-ı a’zamdur
3. Gözüm ki la’lün için katre katre kan aglar  
Hücûm-ı derd-i derûnî meger ki dem demdür
4. Berât-ı hüsnüni takrîr ideli kilik-i ezel  
Şehâ bu mülk-i melâhat sana müsellemdür
5. Selâmet ister isen ‘ışk ile melâmet ol  
Cihânda Hamdi mahabbet tarîk-i eslemdür

### 38

1. Zülfî ol reyhâna benzer sahn-ı bâğı yasanur  
Hâli ol pervânedür düşmiş çerâğı yasanur
2. Yasanur zülfî ‘izârın irmek için la’line  
Hasret-i engûr ile dîvâr-ı bâğı yasanur
3. Hâk-i mihnet bülbül-i miskîne olmışdur bisât  
Sanma anı râhat ile gül budâğı yasanur
4. Şöyle mâ’ildür gözün ser-hoşı her dem câma kim  
Gûşede ser-mest olup düşmiş kabâğı yasanur
5. Derd-i ser anlar cihânun bâliş-i zerrînini



Her kim ol Hamdî gibi seng-i ferâğı yasanur

**39**

1. Ney ki meclisde nevâsı nâleme âheng olur  
Ey niçe ‘uşşâk kaddi bu nevâdan çeng olur
2. ‘Işk Mısırında Züleyhâya odur hem-derd olan  
Yûsufî dînâra dâ’im çihresi hem-reng olur
3. Agladugumca şehâ sa’b oldı kûyun yolları  
Âb-ı eşküm benzer ol yollarda sengîn seng olur
4. Toldı fitne ‘âleme hâlün perîşân olalı  
Dâne-i fülful saçılsa ‘âdet oldur ceng olur
5. Tâ dil-i Hamdîdedür mîm-i dehânun ey sanem  
Deng ü hayrân kaldı gam altında dâ’im teng olur

**40**

1. Cihânda her ki gam-ı ‘ışk ile melâmetdür  
Selâm ana ki kamu gussadan selâmetdür
2. Ne bile gussa-i Mecnûnı vâsf-ı Leylîden  
Anun ki hissesi bu kıssadan hikâyetdür
3. Bilür kırâ’at iden mushaf-ı cemâlünü kim  
Sıfâtı kâmetinün sûre-i kıyâmetdür
4. Ne yirde bir kad-i bâlâsı müntehâ görsem  
Belâsı ‘âşık-ı miskîne bî-nihâyetdür
5. âazel-serâ olur ey Hamdî sana hem-ser olan  
Bu sırr-ı ‘ışkun ezelden işi sirâyetdür

**41**

1. Figân-ı nâyı işit [kim] neden şikâyet ider  
Firâk gussaların[1] meger hikâyet ider
2. Hezâr fitne ile dîde-i mugal-çînün  
Diyâr-ı Çîn ü Hıtâyı dilerse gâret ider
3. Ziyâda gün yüzünü aya itmezem teşbîh  
Ki şu’lesini kamer andan isti’âret ider

4. Bu haste câna ne hâcet ki zahm-i tîg urasın  
Murâdun ölmek ise bir nazar kifâyet ider
5. Şeker hikâyetini tûtî zevkden unıdur  
Kaçan ki Hamdî lebünden haber rivâyet ider

## 42

1. Şevk ile her kim cemâlün şem'ine pervânedür  
Yiri nûr olsun anun kim anladı pervâ nedür
2. Bûy-ı cân-perver gelür bâd-ı sabâdan her nefes  
Kâkûl-i müşkînüne cânâ meger kim şânedür
3. Dögmek ile sînemi kûyuna karşı delmişem  
Revzenin firdevse açdum gerçi kim vîrânedür
4. Muhtesib mey-hâneye mühr urdı ammâ bilmedi  
'Âlemün her gûşesi 'âriflere mey-hânedür
5. Zâhid-i hüşyâr olan bu Hamdî-i şûrîdeyi  
Niçe mey-hwâr anlamasun kim sözi mestânedür

## 43

1. Haddün gibi çemende ne nâzûk semen biter  
Kaddün gibi ne nâzı güzel nârven biter
2. Bustân-ı Mısırî hüsnüne kim nisbet eyleye  
Anda şeker bu ravzada şekker-şiken biter
3. Gözüm yaşı ne Hızr-kerâmet durur 'aceb  
Kim sebz olur yürüdüğü yirde çemen biter
4. Ey rûzgâr içinde vefâ hâsılın uman  
Bir dâne tohmı kalmadı hâsıl neden biter
5. Hamdî zamânededen nice aglamasun bu dem  
Bir tâze gül giderse yirine diken biter

## 44

1. Cigerde dâgum için şefkat ile tag aglar  
Yürekde sûzum için rahm idüp çerâg aglar
2. Ne meclis içre ki bagrum kebâbı yâd olına  
Acır şarâbı yanar şem'i vü kabag aglar

3. Belâlu bülbülünem hasretünde ey gül-i ter  
Şu resme şerh iderem derdümü ki bâg aglar
4. Egerçi def’-i melâl itmek isterüz mey ile  
Velî bu derdün elinden müdâm ayag aglar
5. Ne resme şâd ola ehl-i ta’alluk ey Hamdî  
Cihânda gussa ile merdüm-i ferâg aglar

#### 45

1. ‘Îş-i cihân ki fasl-ı bahâr ile hoşçadur  
Fasl-ı bahâr [ki] vasl-ı nigâr ile hoşçadur
2. Ey dil figân u nâleyi terk itme bir nefes  
‘Âşık hemîşe girye vü zâr ile hoşçadur
3. Dil-berden ayru ‘âşika lâ’ik degül hayât  
Sihhat cihânda sohbet-i yâr ile hoşçadur
4. Sordum şarâb-ı la’lini bir ‘ârife didi  
Devr-i piyâle bûs u kenâr ile hoşçadur
5. Çeşmünde Hamdî hoş yaraşur nakş-ı hatt-ı yâr  
Her kanda sebze olsa bunar ile hoşçadur

#### 46

1. Her kim yanınca bir sanem-i meh-likâsı var  
Her yirde ‘îş u ‘işret iderse revâsı var
2. Dildâr derdmendine hâcet degül tabîb  
Ölmekden özge ol marazun ne devâsı var
3. Nazûklik ile bûse alur leb-be-leb olup  
Câm-ı meyün güzeller ile hoş safâsı var
4. Niçün kesildi bu ser-i zülfün didüm didi  
Dîn ehlinün diyâr-ı Firenge gazâsı var
5. Hıfz itmek için ol sanemün hüsni gencini  
Sagında vü solında iki ejdehâsı var
6. Bir pâdişeh bulıman anun gibi ben garîb  
Anun kapuda bencileyin bin gedâsı var

7. Sögdükçe Hamdî gönlini şîrîn lebi alur  
Şîrînlige ne turfa mücerreb du'âsı var

47

1. Dil-ber yolunun kâfilesi bî-ser ü pâdur  
Ol kâfilenün râhilesi derd ü belâdur
2. Mey-gûn lebi hâsıyyetini dil-bere sordum  
Bu şâfî cevâbı didi kim derde şifâdur
3. Meyl itdi gönül muztarib iken ruh-ı yâra  
Bildüm ki dil-i ehl-i belâ kible-nümâdur
4. Ol sûfîyi kim 'ışk odı hâk eylememişdür  
Âhına nazar eylemezem bâd-ı hevâdur
5. Düşmedi meges gibi bu dünyâ 'aseline  
Ey Hamdî şu cân murgı ki himmetde hümâdur

48

1. Yir gibi her gönül ki toprakdur  
Yüce hâsıl bitürür alçakdur
2. Zevk Mısırınun öz begi ol kim  
Âhen 'ışkî öninde çakmakdur
3. Lenger-i vaz'ı neylesün ol kim  
Bahr-ı 'ıška vücûdı zevrakdur
4. İşigünden şehâ yaşum men'i  
Şattı Bagdâd öninden ırmakdur
5. Bûy-ı zülfün alalı bâd-ı sabâ  
Sünbül üzre nisârı toprakdur
6. Kaddüne öykinür letâfetde  
Serv-i miskîn tavîl-i ahmakdur
7. Kal'a-i hüsnüne zenehdânun  
Gülsitân arasında handakdur
8. Hamdî cânân tecellîsin bir dem  
Bin cihâna alursan aylakdur

49

1. Rûz-ı vaslunda şehâ gamzelerün cân aparur  
Mevsim-i ‘îd olıcak her kişi kurbân aparur
2. Âsitânunda diler dil ki vatan tuta velî  
Mûr-ı bî-çâre kaçan mülk-i Süleymân aparur
3. Türk ü Tâtâr mıdur çeşm-i mugal-çînün kim  
ââret-i cân u dil eyler ser ü sâ mân aparur
4. ‘Acabâ bâd-ı hazân mı ki bu devrân-ı serî’  
Ki niçe ser koparur çok gül-i handân aparur
5. âirre olma felegün Hamdî ziyâfâtına kim  
âadr ile her gice bin bin ser-i mihmân aparur

50

1. Ol bir hümâ ki sâyesi devlet nişânıdır  
Serv-i revânı bâg-ı melâhat nişânıdır
2. Vaslını umaram ruhı devrinde aglasam  
Bârân-ı nev-bahâr ola rahmet nişânıdır
3. Görsem seg-i rakîbi firâkı düşer dile  
Zîrâ har-ı Mesîh kıyâmet nişânıdır
4. Dinmezse kanı gamzesi maktûlinün ne tan  
Kâfir elinde öldi şehâdet nişânıdır
5. Serv öykinürse kaddine Hamdî ‘aceb degül  
Bâlâ-yı kâmet ana hamâkat nişânıdır

51

1. Mecnûn odur ki gussa-i Leylâda şâd olur  
Tahsîn ana ki vahş iken hoş-nihâd olur
2. Şevkum beyânına elüme çün kalem alam  
Dil rikkat ile kâgıd u eşküm midâd olur
3. Sırr ile seng urur idüm seg rakîbe lîk  
Korkum bu taş taşa tokınur çok fesâd olur
4. Sad âferîn o pîr-i harâbât-ı ‘ışka kim

Her kim mürîd olursa ana bî-murâd olur

5. Şâd oldı ‘ahd-i bûs-ı dehânıyla Hamdî lîk  
Bî-çâre bilmez anı ki yok yire şâd olur

## 52

1. Dâd ümîdine o kim sen şeh-i bî-dâda gider  
Ferah u şâdî umup nâle vü feryâda gider
2. Karşular gamze-i hûn-rîzünü cân ile gönül  
Gelse saydun eceli cânib-i sayyâda gider
3. Zülfinün turraların bâd-ı sabâ depredecek  
Berg-i ‘ömri niçe sevdâ-zedenün bâda gider
4. Dest-res ol sanemâ rahm idüp ol sâ’ile kim  
Gözümün yaşı gibi kûyuna üftâde gider
5. Hamdî ol merde gulâmem ki murâdı yolına  
Varlığı kaydını terk eyleyüp âzâde gider

## 53

1. Her mübtelâ ki derdine ‘ışkî devâ bilür  
Tıbb-ı tabîbi derd-i ser anlar hatâ bilür
2. Gönlüm ‘imâret eylese tan mı hayâl-i dost  
Genc ü hazîne kıymetini pâdişâ bilür
3. İksîr-i hâk-i pâyla yüzüm zer eyledüm  
Kimdür cihânda bencileyin kîmiyâ bilür
4. Şîrîn lebi safâsını cân Kevser anladı  
Sidre boyı sıfâtını dil Muntehâ bilür
5. ‘Uşşâkı Hamdî ögse nigârî nevâ ile  
Zîbâ terennüm itmege nâzûk edâ bilür

## 54

1. Her ki ol sâlik-i tarîkatdür  
Menzil-i evvel ana ‘ibretdür
2. Şevk-ı ‘âşık ziyâ-yı devlet-i dost  
Zevk-ı sûfî safâ-yı cennetdür

3. Nev-bahâr irdi köhne nûşıyıcın  
Kâ'im ol kim dem-i kıyâmetdür
4. Münkir-i rûz-ı haşr u neşr üzre  
Kâmetün bir kıyâmet-âyetdür
5. Ger bu kâmet gibi kıyâmet ola  
Bize mahşer makâm-ı cennetdür
6. Def'-i şerr-i rakîbe kasd itdüm  
Himmat eylen ki hayr niyyetdür
7. Hâtır-ı câm olalı bize safâ  
Sîne-i sûfi pür-küdûretdür
8. Hûblardan vefâ umar Hamdî  
Çünkü sûret delîl-i sîretdür

## 55

1. 'İşkdan ehl-i 'âr 'ârîdür  
'İşkî sanman ki ihtiyârîdür
2. İhtiyârıyla 'ârı terk eyler  
Derdi anun ki 'ışk kârıdur
3. Beni hayrân u mest iden sanemâ  
Nergis-i mestünün humârıdur
4. Gönlümün ravzasını tâze kılan  
Fürkatinde gözüm bunarıdur
5. Derd ile Hamdî dil-figâr oldı  
Her dem efkârı 'ışk kârıdur

## 56

1. Yüzün medhinde bu gönlüm yazup dîvân-ı defter ter  
Gülün evrâkını kıldı cihân içinde ebterter
2. Gönül derdün diyârına düşüpdür haylî müddetdür  
Nola bir dem sorarsan bu garîbi ey sitemger ger
3. Saçun 'ayyârınun devrinde baş kaldurdı her fitne  
İnen yüz virme ey dil-ber ana kim hadden aşar şer
4. Yolunda harc-ı sîm itmek delâlet kılmaz ihlâsa  
Bu yolda hâlis oldur kim anun yüzine benzer zer

5. Yakasın çâk ider Hamdî şafak gibi bu şevk ile  
Ki yüzine anun bir dem açâ gün gibi dil-ber ber

### 57

1. Gözlerün ‘ayyârı kim bir âl ile bin dil kapar  
Nergis öykinse ana zerrîn külâhın yil kapar
2. Kâr[u]bârın kapdı zülfün kûyuna ‘azm idenün  
Hac yolında sanasın düzd-i ‘Arab mahmil kapar
3. Sen lebün depretmek ile cân fidâ eyler gönül  
Cünbiş-i şehden murâdı bende-i mukbil kapar
4. Gözlerüm şûrîdesi kapdı miyânun nakşını  
Merdüm-i hayrân olanun iştihâsı kıl kapar
5. Hamdî sen şekker-leb ü gül-çihre vasfin söylese  
Bülbül elhân öğrenür gülşende tûtî dil kapar

### 58

1. Derdâ bu derde itmedi hergiz devâ sefer  
Gerçi dinildi ‘aşka yâ sabr u yâ sefer
2. Berg-i karâr u sabrı virüp bâd-ı hayrete  
Kıldum belâ diyârına ben bî-nevâ sefer
3. Tan mı sefer didükleri nâr-ı cahîm ise  
Cennet yüzünden itdi beni çün cüdâ sefer
4. Bende karâr kalmadı sen gideli şehâ  
Bende ne sabr ide idicek pâdişâ sefer
5. Atdı hevâya derd eli Hamdîyi ok gibi  
İtdi firâk-ı yâr ile kaddini yâ sefer

### 59

1. Zülfün ol zünnârdur kim nûr-ı î mân andadur  
Ruhların ol nârdur kim âb-ı hayvân andadur
2. Dâmenine vaslunun irişmek olurdı velî  
Hecr elinden âh kim dâ’im girîbân andadur
3. ‘İşka inkâr eyledi zâhid anun i’câzına



Mushafını hüsnünün ‘arz id ki burhân andadur

4. Nola keşf itsen dehânun hokkasın rahm eyleyüp  
Kim niçe Hamdî gibi bîmâra dermân andadur

### 60

1. Her kim ol bâde(y)i helâl ister  
Eser-i ‘ışk-ı Lâ-yezâl ister
2. Gönlün ile rakîb gâfil iken  
Dil lebün zevkına mecâl ister
3. İki taş arasında la’lün umar  
Gör ki bu teşne-leb zülâl ister
4. Fitne zülfün elinden efgân kim  
‘Âlemi cümle pâ-y-mâl ister
5. Hamdî döymez cefâya la’lün umar  
Sabr idemez belâya bal ister

### 61

1. Müjde ey dil kim haber bâd-ı sabâdan bû gelür  
Mesken-i miskînine ol gözleri âhû gelür
2. Gûşe-i mescidde zâhid bârid iken bu ‘aceb  
Külbe-i mey-hânelerden na’ra-i yâ Hû gelür
3. Perdeyi her kim hevâ-yı yâr ile çâk eyleye  
Gül gibi andan dimâg-ı ‘âleme hoş-bû gelür
4. Eyle korkutmuş durur Hamdîyi yârun hasreti  
Kim visâlinde dahı kalbine ol korhu gelür
5. Yâd idicek la’lünü tolar yüregi kan ile  
Anıcak dendânını gözlerine lûlû gelür

### 62

1. Sordum lebini didi [ki] cândur  
Ol kim sözi râhat-ı revândur
2. Didüm benüm olsa tîg-i gamzen  
Lutf ile didi ki der-miyândur
3. Kân itdi gözümü la’l-i nâba

Yâkût-ı lebi ki kût-ı cândur

4. Çeşmüme yüzi ziyâ virelden  
Sırr-ı dü-cihânî ana ‘ayândur
5. Bu Hamdî zülâl-i vaslıyıçün  
Heccinde yanar niçe zamândur

### 63

1. Meylüni nâza kılma [kim]bana gam-ı felek yiter  
Zahmumı tâze kılmaga gamdan iren nemek yiter
2. İrmedi merd-i müdde’î ehl-i belâ gibi sana  
Ehl-i yakîne ey sanem sanma ki ehl-i şek yiter
3. Şükr-i ta’âmı vâ’izâ sûfi-i lût-bâza ög  
Bana bu pendî itme ki ‘âşıkâ gam yimek yiter
4. Mürşid-i râh-ı Hakk isen benden irâdet isteme  
Çünkü rızâsı dil-berün ehl-i dile dilek yiter
5. Hamdî kemâl-i sermedî hâlet-i ‘ışk ise eger  
‘İşk ile her gazâl içün sana gazel dimek yiter

### 64

1. Ey gönül her sanemün ‘ışkına yanmak niçe bir  
Çeşm-i hûn-rîzleri kanuma kanmak niçe bir
2. Dil-berün zülfi hevâsında ruhi şevkıyla  
Dem-be-dem yile uyup suya tayanmak niçe bir
3. Dil berî eyle havâdisden ola yâr-ı kadîm  
Her gözün sevdüğün ol dil-beri sanmak niçe bir
4. Her gice haste gönül eski belâyile yatup  
Her seher bir yeni derd ile uyanmak niçe bir
5. Hamdî gül yüzlülerün lebleri şevkında müdâm  
Cigerün gonca gibi kana boyanmak niçe bir

### 65

1. Pertevinden yüzüne kimse nigâh eyleyimez  
Nazara ol eseri mihr ile mâh eyleyimez

2. Eyle dem-beste kılur ‘âşıkı dil-ber gamı kim  
Bin yıl odlara yanup bir nefes âh eyleyimez
3. Rûz-ı da’vîde niçe ‘âşık-ı ser-bâz geçen  
Vakti ma’nî olıcak terk-i külâh eyleyimez
4. Râz-ı ‘ışkı dem-i neyden nice fehm itsün o kim  
Çengveş kaddini derd ile dü-tâh eyleyimez
5. Sa’y idüp Hamdî diler kim sana kul ola velî  
Kişi cehd ile özin ‘âleme şâh eyleyimez

**66**

1. Ser-i kûyun sanemâ Ka’be-i ‘uşşâka Hicâz  
Kible-i hâcet idinmişdür anı ehl-i niyâz
2. Zülfün ile lebün öldürdi beni turfa budur  
Birisi âb-ı hayât u birisi ‘ömr-i dırâz
3. Eser itmege tarab mutribe göz yaşı gerek  
Bir kuru zezemedür olmayıcak sûz ile sâz
4. Ol sanem geldi geçer secde gerek kâmetine  
Vâ’izâ va’zı dırâz itme geçer vakt-i namâz
5. Hamdî cânun niçe bir murg-ı hevâyî gibidür  
ââfil olma irişür bir gün ana pençe-i bâz

**67**

1. Niteki Sidre boyun gibi serv nâz idemez  
Kimesne bencileyin karşuna niyâz idemez
2. Sözü melâhati şûrîde eyler işideni  
O sihri kim dehenün itdi hokka-bâz idemez
3. Hadeng-i gamzelerün üzre dilde cân oynar  
Bu lu’bı hançer-i tîz üzre cân-bâz idemez
4. Safâyile ser-i kûyunda ‘âşıkun sa’yin  
Safâ vü Mervedeki hâcî-i Hicâz idemez
5. Bahâr mevsimidür Hamdî tevbe vakti degül  
Bu demde ‘ışkı olan meyden ihtirâz idemez

**68**

1. Tâ kim harîm-i meclis-i ‘uşşâka mahremüz  
Derd ile yâr-ı cânî vü âh ile hem-demüz
2. Toldı egerçi kan ile dil goncası velî  
Şevk-ı leb ü dehân-ı nigâr ile hurremüz
3. Teslîm-i cân eyleyeli zülfi bendine  
Dîvâneler gürûhı içinde müsellemez
4. Yolında düşüp aglar idüm didi gözlerüm  
Bir iki bürke sâkî-i râh-ı mu’azzamuz
5. Kûyında kasd-ı cân idicek Hamdî didi kim  
Katl eyleme bizi kerem id sayd-ı mükremüz

### 69

1. Her kim cihân içinde bir dil-rübâsuz olmaz  
‘Âlem anun durur kim her dem safâsuz olmaz
2. ‘Uşşâkı kûyun içre men’ itme nâlesinden  
Çün gülsitân içinde bülbül nevâsuz olmaz
3. Gözümde nakş-ı kaddün olalı yaş dükenmez  
Her kanda fitne olsa ol mâ-cerâsuz olmaz
4. Ol cân ki la’lün umar zülfünde sâkin olsun  
Çünkü sevâd-ı a’zam dârü`ş-şifâsuz olmaz
5. Mümkün degül ki Hamdî kaddünsüz ola bir dem  
Togrısı hoş dimişler ‘âşık belâsuz olmaz

### 70

1. Hatm olup ‘ömrüm eger kalmaya bende bir nefes  
Sanma kat’ idem hevâ-yı vasl-ı zülfünden heves
2. Gözlerün olup harâmî başladı başlar keser  
Mısr-ı hüsnüne olalı iki kec Hindû ‘ases
3. Hem-demüm hecründe her gice nesîm-i subh idi  
Bu gice bilmen niçün olmaz benümle hem-nefes
4. ‘İşkun ile gönlümün hâlin sorarsan dostum  
Nicedür işde bilürsin cem’ ola nâr ile has
5. Âh elinden âhumun kim hasrete saldı beni  
Bülbüli efgânıdur iden giriftâr-ı kafes

6. Şehrden gitdügümi yâr ile fâş itdün ile  
Bogazundan asılup dilün tutilsun ey ceres
7. Câhil ü nâ-cinse ey Hamdî sözün ‘arz eyleme  
Zâga hoşdur sad hezârün nagmesinden bir meges

### 71

1. Mühr urdı lebün agzuma kim eyleye hâmûş  
Ey meh nideyin mühri açar mihrün idüp cûş
2. Vaslun günü bildürdi bana kadrin o dem kim  
Hecrün gicesi kıldı beni vâlih ü medhûş
3. Zülfeynün arasında görüp yüzünü sandum  
Bir sîm büte secde kılur iki siyeh-pûş
4. Baht-ı siyehüm hâlini yârun kulagina  
‘Arz eyleyimez kimse meger hâl-i bünâgûş
5. Bu Hamdî-i âvâreyi âzâde yürürken  
Zülfine esîr eyledi bir serv-i kabâ-pûş

### 72

1. Gözlerün ‘âşıklara pür-kîn imiş  
Zülfünün küfri belâ-yı dîn imiş
2. Virmemiş bu ‘âlem-i telvîne dil  
Ol kişi kim merdüm-i temkîn imiş
3. Hüsnün ayın ‘âşıka ‘arz itmedün  
Dil-bere cevri eylemek âyîn imiş
4. Hor bakmışdur mahallen kelbine  
Ol rakîbün kim katı hod-bîn imiş
5. Hamdî gibi dil-berün zülfi hamı  
Fursat el virse ‘aceb miskîn imiş

### 73

1. Gözün sayyâdı kaşundan iki müşkîn kemân asmış  
Şikâr ehline ‘âdetdür ki yüzde bir nişân asmış
2. Hisâr-ı hüsnünün cânâ gözün dizdârı olaldan

Yasag için dü cânibde dü Hindû pâsbân asmış

3. Meger şîrîn dehânundan şeker lezzet ugurladı  
Dükân öninde anunçün anı ehl-i dükân asmış
4. Cemâlün câmi'in ma'mûr iden tezyîn için anı  
Ser-i zencîr-i zülfünde niçe kandîl-i cân asmış
5. Sakın baglama ey Hamdî gönül dünyâ 'acûzına  
Ki kolın boynuna anun niçe pîr ü cüvân asmış

#### 74

1. Ol kamer kim gün gibi şekl-i müdevver bağlamış  
Lâle gibi ruhlarında la'l-i ahmer bağlamış
2. Leblerinden lezzet alursa 'aceb mi sa'y ile  
Ney-şeker gibi o kim bilin mükerrer bağlamış
3. Mısr-ı hüsnin korkaram âhir harâb ola diyü  
Hatt-ı dil-ber kim had üzre saff-ı leşker bağlamış
4. Ey niçe başlar keser zulm ile devr-i bî-amân  
Sûsen anunçün biline tîg u hançer bağlamış
5. Hamdî medh itmege gül yüzlü güzeller hüsnini  
Rengîn evrâk üzre yine tâze defter bağlamış

#### 75

1. Bu dem ki pîr-i mugândan irişdi bâde-i hâs  
Nihân içen anı rindâne gamdan oldı halâs
2. Lebine diş bilerem zahm uralı cânuma yâr  
Buyurdu hakkımı çün hükm-i "el-cürûhi kısâs"
3. İ zülf-i yâr beni penbe gibi dögse gamun  
Koman men ol gamı Hallâc gibi dâruna as
4. Muhît-i 'ışka talup dürr-i ma'rifet mi bulur  
Çıkarmayınca vücûdı libâsını gavvâs
5. Gönül kitâbına Hamdînazar kılup gördüm  
Ki 'ışka hâtime imiş nihâyet-i ihlâs

#### 76

1. Dehenün bûsesine alur isen cânı ‘ivaz  
Şübhe yok cânı olanlar viriser anı ‘ivaz
2. Nesme-i kûyun ile cûşa gelür bülbül kim  
Almazam şemmesine bûy-ı gülistânı ‘ivaz
3. Dil Halîli elem-i derdün için cân virdi  
Bir ciger-gûşe için eyledi kurbânı ‘ivaz
4. Virmezem sünbülünü nâfe-i Tâtâra bedel  
Almazam leblerüne la’l-i Bedehşânı ‘ivaz
5. Dil-i Hamdî mey-i sevdân ile ser-mest olalı  
Virdi bir hayrete yüz bin ser ü sâ mânı ‘ivaz

77

1. Yazdı kitâb-ı hüsnüne hatt-ı gubâr hat  
Kıldı gül üzre rîze-i müşki nisâr hat
2. Seyr eylemege cennet-i kûyunda ‘îş iden  
Kevser lebün kenârın ider sebzâr hat
3. Toprak başına hat gibi ol ehl-i hâmenün  
Hattuna benzedem diyü yazdı gubâr hat
4. Mûsî kerâmetin yed-i beyzâda ‘arza kıl  
Fir’avn kavmi gibi ola târmâr hat
5. Gülşen letâfeti nitekim sebze iledür  
Hamdî cemâl revnakıdur âşikâr hat

78

1. Her kanda zebânım ki ola ismüni lâfız  
Bin dil bulunur anda ki cümle anı hâfız
2. Fikr itse nihâyet bulmaz hüsnüne ‘âkil  
Zikr eylese gâyet bulmaz vâsfuna lâfız
3. ‘İşk olmasa âdemde hemân mürde gibidür  
Var kendü ölün agla beni aglama vâ’iz
4. Çün penbe-i gaflet gide cânun kulagından  
Gûş eylesin cümle mevâzî’da mevâ’iz
5. Kapundan ırag itdi felek Hamdîyi ammâ  
Yok lahza ki olmaya cemâlünü mülâhız

79

1. Gözlerüm toymadı eyler ruh-ı cânâna tama'  
Sîm karşısına lâzım gelür insâna tama'
2. Diş biler dirler işitdüm leb-i dildâra rakîb  
Dîvdür kılsa nola mühr-i Süleymâna tama'
3. Leb-i yâr özileyen zülfe giriftâr olur  
Ôulmete düşer iden çeşme-i hayvâna tama'
4. Hamdîyi çâh-ı firâka düşürür hırs-ı visâl  
Ey niçe câmı esîr eyledi zindâna tama'

80

1. Pervâne gibi kanda olur hem-zebân-ı şem'  
Şevk ile cânın eylemeyen der-miyân-ı şem'
2. Pinhân olursa nola saçun ey çerâg-ı dil  
Gözden hemîşe çünkü nihândur duhân-ı şem'
3. Dil uzadur ki şevk-ı ruhundan haber vire  
Her meclis içre tan mı kesilse zebân-ı şem'
4. Ey nûr-ı haddi zulmet-i zülf ile setr iden  
Pervânevâr cânım oda yandı kanı şem'
5. Aglama Hamdî derd ile kim âşikâr olur  
Agladuginca rîş-i dil ü sûz-ı cân-ı şem'

81

1. Dil kim fûrûg-ı 'ışk ile gamdan bulur ferâg  
Bir hücredür ki rûşen ider şu'le-i çerâg
2. Sûfibelâ-yı 'âşika inkâr ider belî  
Ahvâl-i hasteyi ne bilür her kim ola sag
3. Zülfi katında da'vî-i hoş-bûyî eyledün  
Ey nâfe kanda oldu sana bu kadar dimâg
4. Rind-i zamânenün meseli lâledür kim ol  
Başın yile virince elinden komaz ayag
5. Çağında bir püser göricek Hamdî cân virür



Pîr oldu gerçi gitdi cevânî vü geçdi çağ

**82**

1. Olmaz perîde sencileyin peyker-i latîf  
Şekl-i melek misin ‘aceb ey manzar-ı latîf
2. Ey niçe yakalar yakısar sîne âteşi  
Ger açmaz ise gül gibi dil-ber ber-i latîf
3. Bâg-ı tarâvet içre boyun serv-i tâzedür  
Firdevs-i hüsn içinde lebün Kevser-i latîf
4. Ey dil gözümde kâkûli ‘aksin teferrüc it  
Deryâda görmek ister isen ‘anber-i latîf
5. Gül-gûn yüzün tarâvetini Hamdîmedh ider  
Rengîn varaklar üzre yazup defter-i latîf
6. Dürr-i suhan bahâsını ehl-i hüner bilür  
Her bed-güher ne bile nedür cevher-i latîf

**83**

1. Görmedüm dîdâr-ı yârı kûyın eylerken tavâf  
Oldı sa’yüm nûr görmez hâcîler gibi güzâf
2. Dâl kaddüm nice eylesün tahammül fûrkate  
Kim götürse ol yükün bir tâyını lâm ola kâf
3. Bir letâfet virdi Hak Sidre boyuna eyle kim  
Serv gibi niçe âzâdı kul eyler bî-hilâf
4. Sâbit idi safha-i dilde elif kaddün hemân  
Yazmadın levh-i vücûda kâ’inâtı nûn u kâf
5. Tîg-i gamzen tîzdür ol resme kim bir lahzada  
Haste-diller sînesinden pâreler bin bin gılâf
6. Bir mihakdür âsitânun sengi kim ‘âşıklarun  
Ruhları dînârın anda fark iderler kalb u sâf
7. Ol kalender-meşrebe erzânîdür âzâdelik  
Oldı ol Hamdî ta’alluklar belâsından mu’âf

## 84

1. Cân mı var kim gamzen okından cigerde tîri yok  
Taş ola ol dil kim andan sîne de te'sîri yok
2. Zülf ü ruhsârun hevâsından dem urmasun o kim  
Âh-ı subh-efrûzıyile nâle-i şeb-gîri yok
3. Hatt-ı Yâkûtı muhakkak hatt-ı la'lün nesh ider  
Sen sanem misli nitekim Mânî'nün tasvîri yok
4. Taglar deldi figânum kalbüne kâr eylemez  
Taşlara kâr eyledi âhum ana te'sîri yok
5. Hamdî takdîre siper olmaz çü tedbîr-i Hakîm  
Ehl-i tedbîr ol durur 'âlemde kim tedbîri yok

## 85

1. Ey perî şânun durur diller perîşân eylemek  
'Âdetidür gamzenün bir demde bin kan eylemek
2. âirre olma hüsne kim bu rûzgârın kârıdur  
Yûsuf-ı Mısr'ı esîr-i çâh-ı zindân eylemek
3. Kanlu yaş ile gerek şimden girü rüsvâ olam  
Niçe bir gamzen okın sînemde pinhân eylemek
4. Gelme zahmet olmasun ben haste üzre ey tabîb  
Derd var iken gerekmez bana dermân eylemek
5. Cân idinüp Hamdîcânânı kılurdı terk-i cân  
Elde olaydı kişi kendüsine cân eylemek

## 86

1. Bir içim sudur meger ey gamze peykânun senün  
Teşne-diller yalmanur gördükçe yalmanun senün
2. Âdemi zinde kılur dirler hayâtun çeşmesi  
Öldürür ben teşne-cânı âb-ı hayvânun senün
3. Bu zenehdân içre kim düşmişdür ol hâl-i garîb  
Niçe miskînler düşüre çâh-ı mihmânun senün
4. Devr-i hüsnünde lebün lezzet virür 'âşıklara  
Mısrî şekerler bitürse nola dükkânun senün

5. Niçe ag ola yüzün bu 'ışk içinde Hamdî kim  
Âh dūdına buhârîdür girîbânun senün

**87**

1. Cihâna bâde-i 'ışkı sunup hammârı Gülzâr'un  
'Aceb mest oldı bülbüller olup mey-hnârı Gülzâr'un
2. Niçe tâvûs-ı hoş-cevlân olaydı bülbül-i elhân  
Gülîni itmese pinhân eger gülzârı Gülzâr'un
3. Ma'ârif bûstânında olur her gonce bî-perde  
Açıla gül gibi çün kim kamu esrârı Gülzâr'un
4. Niçün nergis gibi ey yâr olursun derd ile bîmâr  
Tabîb-i hâzık istersen yiter tîmârı Gülzâr'un
5. Taşup 'ışk ile 'ummân ol gönül mülkine sultân ol  
İre cânun kulagina dür-i şehvârı Gülzâr'un
6. Gül-âb-ı ma'rifet bûyı tolup bâzâr-ı 'uşşâka  
Kaçan kim 'ışk dükkânın açâ 'attârı Gülzâr'un
7. Niçe dîvâne bülbüller düşüp hayrân u mest olmuş  
Tolu sunmuşdur anlara meger hammârı Gülzâr'un
8. Açıla dîde-i a'mâ basîr ola kamu eşyâ  
Salarsa 'âleme pertev eger envârı Gülzâr'un
9. Gönül sengini ey Hamdî külüng-i 'ışk ile hâk id  
Ki bite anda görine gül-i âsârı Gülzâr'un

**88**

1. áamzen okına cân u cigerden siper gerek  
'Uşşâka 'ışk ma'rekesinde ciger gerek
2. Çevgân-ı zülf-i dil-bere top olmag isteyen  
Meydân-ı derd ü gussada bî-pâ vü ser gerek
3. Yârün cemâli nûrı degül dîr dîdeden  
Ammâ teferrüc itmege sâhib-nazar gerek
4. Eşk ile rûy-ı zerd gerek yâra varmaga  
Dîdâr-ı Ka'be haccına sîm ile zer gerek
5. Yüzün lebün gamı giderür zevk-ı 'âlemi  
Ol derd-i ser 'ilâcına bu gül-şeker gerek

6. Zâhid ki murg-ı cânına dâm itdi uçmağı  
Düşmeyüp andan uçmaga gey bâl ü per gerek
7. Hamdî dehân-ı yâr gibi şâ'irün sözi  
İçi vü taşı pür-güher ü muhtasar gerek

## 89

1. Zülfüne dil bağlayan 'uşşâka şeydâlık gerek  
Derdün ile aqlayan gözlere deryâlık gerek
2. Ay yüzün aydıncagıdur şehr-i Belkıs-ı cemâl  
Eksügi budur hemân anda temâşâlık gerek
3. Sûfî cennet salığın sorar komış dil-ber yolın  
Neylesün kara başına anun ol salık gerek
4. Cân virüp sana gönül derd aldı ben dellâlıyam  
Lebleründen ey sanem dellâla helvâlık gerek
5. Hamdî`yi söyletmek istersen lebünden bûse vir  
Çün kelâma gelmege tûtüşeker-hâlık gerek

## 90

1. Dâ'irenden beni dûr eyledi devvâr felek  
Âdemîlik kılasın vaktidür ey reşk-i melek
2. 'Âşıkuntende hayâtı ruh-ı yâr ile olur  
Diri olmaz nitekim sudan ırag olsa semek
3. Ey bana vuslat-ı dildârı taleb eyle diyen  
Giç bu sevdâda bulunmaz dil-i 'âşıkda dilek
4. Yüregüm pâreleyüp turdı hadengün yirine  
'Âşıkta katı demürden gerek ey dost yürek
5. áamunı Hamdî çeker la'lüni gayrılar emer  
Hoş didiler bunı kim kime yimek kime emek

## 91

1. Ey gamun ârâmıdur 'âşıklarun  
La'l-i nâbun câmidur 'âşıklarun
2. Ka'be-i hüsnün safâsı sa'yine

Terk-i cân ihrâmıdır ‘âşıklarun

3. Bî-nişân olmak olarun şânıdır  
Bî-nevâlık nâmıdır ‘âşıklarun
4. Terk-i ârâm eylemek zülfün gibi  
Gönlünün ârâmıdır ‘âşıklarun
5. Sözleründerd arturur Hamdî senün  
Çün kamu ilhâmıdır ‘âşıklarun

## 92

1. Cânımın gitdi hayâtı yüzünü görmeyicek  
Kalmadı tende sebâtı yüzünü görmeyicek
2. Ko beni gark olayın göz yaşı deryâlarına  
Niderem fülk-i necâtı yüzünü görmeyicek
3. Kerem id ‘âleme rahm eyle sefer eyleme kim  
Yakaram cümle cihâtı yüzünü görmeyicek
4. Düşeyin nâr-ı cahîme içeyin mâ-ı hamîm  
Niderem ‘azb ü furâtı yüzünü görmeyicek
5. Hamdî`nün kopdı kıyâmet başına hasret ile  
Gördi rûz-ı ‘arasâtı yüzünü görmeyicek

## 93

1. Âyîne-i Hudâ'dur Hakk'a cemâli şeyhün  
Dürr-i girân-bahâdur cümle hayâli şeyhün
2. Çün vahdet ile kesret sırrında zâhir oldı  
Bahreyne mecma’ olsa tan mı kemâli şeyhün
3. Dâyire-i kemâli geçdüm ‘ayâna irdüm  
Mezkûr olalı dilde her dem hayâli şeyhün
4. Tanbûr-ı sîne tan mı bî-perde nâle itse  
Islâh idüpdür anı çün gûş-mâli şeyhün
5. Nâkıs durur hünerde keşf-i sahîhi yokdur  
Her kim diye cihânda vardur misâli şeyhün
6. Kalbün ‘aceb mi hâlis zer gibi olur ise  
Çünkim eritdi anı pâk itdi kâli şeyhün

7. Hamdîfakîri fûrkat dil-haste itmiş idi  
Şûkr olsun uş safâlar virür visâli şeyhün

94

2. *Makâm-ı ubûdiyyet ez-dergeheş*  
*Muhillest ân râ ki şod muzmahil*
3. Habîbün miyânın bulursın gönül  
O dem kim ara yirde sıgmaya kıl
4. Görindün şehâ bir cemâl ile kim  
Gül-i bâg-ı hüsn oldu andan hacil
5. Vücûdum yanaldan hevân odına  
Beni senden ayırmadı âb u gil
6. *Dü âlem zi-rûyet münevver buved*  
*N-bâşed zi-mûyet eger medd-i zil*
7. Tapunsuz ki mülk-i müseccel bulam  
Kara yazu olur bana ol sicil
8. Dilersen ki kat'-ı tarîk idesin  
Gel ey Hamdîsenden sen evvel kesil
9. *Torâ çerh-i gerdun ki mehlî dihed*  
*Zi-destet câm-ı cân-fezâ me-hil*

95

1. *Ey şem'-i cem'-i zümre-i uşşâk-ı zi'l-celâl*  
*Pervâne-i şu'â-i toyî şî'a-i kemâl*
2. Her 'âkil oldu fikr-i kemâlünde bî-hired  
Her nâtik oldu zikr-i cemâlünde güng ü lâl
3. *Gerdun aceb çi cürm koned pîş-i izzetet*  
*Hançer keşîd be-sîne-i û cirm-i in hilâl*
- 4 Her dil zücâcesine ki nûrundan irişe  
Mişkât-ı sînesinde komaz zulmet-i dalâl
5. *Fakr-ı Muhammedî ki müyesser şeved torâ*  
*Mâl u menâlet er ne-buved Hamdiyâ me-nâl*

96

1. Nigâr şevkına bil bağladı meger kındîl  
Ki yanar odlara her gice tâ seher kındîl
2. ‘Aceb ne câmi’-i zîbâdur ey melek hüsün  
Ki âfitâb ana mısbâh olur kamer kındîl
3. Yüzünü medh idicek şevkdan dili tolaşur  
Ne denlü çerb-zebân ise ey piser kındîl
4. ‘Aceb ne silsileden dem urur ki sûffivâr  
Safâ-yı bâtın ile buldı nûr u fer kındîl
5. Yiri hevâ yüregi âb u sînesi âteş  
Zebân-ı hâl ile Hamdî`yi vasf ider kındîl

97

1. Öykinimez bilüne dikkatde kıl  
Cânı yokdur kim katında kıla kıl
2. Koma varmaga rakîbi kûyuna  
Kavl-i sâdıkdur bilürsin “el-bahîl”
3. Cân sebîl itsün şarâb-ı la`lüne  
Her kim isterse sebîl-i selsebîl
4. Bulmadum gâyet saçun sevdâsına  
Ben ki yildüm bu hevâda niçe yıl
5. Çekmedün yârün dil-i sengînini  
Gerçi Hamdî eyledün cerr-i sakîl

98

1. Mûnisüm kabrümde mihrün olısar ba`de`l-ecel  
Hoş meseldür kim dinür “el-kabru sandûku`l-amel”
2. Göz göre öykinmez idi çeşm-i yâra fi`l-mesel  
Çeşm-i nergisde eger olmasa fi`l-cümle havel
3. Zülfi ucın la`l-i yâra irdügin görüp didüm  
Hoş dimişler hîçe irer ‘âkıbet tûlû`l-emel
4. Dil-berün vakt-i vedâ`ında dilüm tutıldı âh  
Dil tutılmak müşkil imiş hasteye irse ecel

5. Bahtum uyansa rakîb ölse anun helvâsına  
'Âlem içinde bulunmaz Hamdî miskînden mahal

**99**

1. Ol şeh ki kılur vakt-i terahhumda tegâfûl  
Ben bendede kalmadı cefâsına tahammül
2. Sevdâ-zede 'âşıkları öldürmege iy dost  
Zülfün gibi eyleme inen dest-i tetâvül
3. Sînemde cefâ hârî ile şerhalar itdün  
Ey gül ne ziyân itdi sana sohbet-i bülbül
4. Em kılmaz isenla'lün ile derd-i 'alîle  
Eyleme helâk eylemege bârî ta'allül
5. Gencîne için çekme heves rencini Hamdî  
Oldunsa eger mu'tekif-i künc-i tevekkül

**100**

1. Çünkü dâmân-ı yâr elümde degül  
Gitdi sabr u karâr elümde degül
2. Âhunodını sakla didi didüm  
Âh kim ihtiyâr elümde degül
3. Ayaga saldı gam beni tâ kim  
Bâde-i gam-güsâr elümde degül
4. Vuslata tâlib olalı bildüm  
Devlet-i pâydâr elümde degül
5. Nola Hamdî yakamı çâk itsem  
Çünkü dâmân-ı yâr elümde degül

**101**

1. Âsitânunda şehâ her dem zelif eksük degül  
Nitekim dârü'ş-şifâda bir 'alîl eksük degül
2. Kalmışam kûyunda cânâ güft ü gûyunzevkına



Menzili firdevs olana selsebîl eksük degül

3. Hasretün bîmârına hiffet müyesser olmadı  
Çünkü vaslunmeclisinde bir sakîl eksük degül
4. Cân alup baş kesmegi kesmedi gamzen hançeri  
Kanda âşûb olsa anda bir katîl eksük degül
5. Devr-i hüsnünde okur Hamdî miyânun medhini  
Bülbüle gül mevsiminde kâl ü kîl eksük degül

## 102

1. Müdâm sun bize ey sâkî-i şarâb-ı kadîm  
İçelüm anı “alâ-rağmi enfe külli garîm”
2. Bize o sâkî gerek kim şarâbı bâkîdür  
Bizüm o bezme safâmuz ki dâyim anda na’îm
3. Cahîm vuslat-ı yâr ile bâg-ı cennetdür  
Behişt fûrkat ile ‘âşîka ‘azâb-ı elîm
4. Celâl ü ‘izzetüne irmedi kamu hâkim  
Kemâl-i hikmetüni anlamadı cümle hakîm
5. Çekerdi çâk idüp “len terânî” perdesini  
Eger kilîm-i vücûdı oda yakaydı Kelîm
6. Erirdi levh kelâmundan olmasa mahfûz  
Kalem zebânı anunlezzetinden oldu dünîm
7. Diyâr-ı hasret anun kim tapuna dûr oldu  
Makâm-ı rif’at anun kim kapunda oldu mukîm
8. Dil-i hakîkî o kim müstevâ-yı Rahmândur  
Yaraşa Hamdî o kalbe dinilse ‘arş-ı ‘azîm

## 103

1. Senâdur senâ-yı imâmü`l-enâm  
Aleyhi`s-salâti aleyhi`s-selâm
2. *Bidâ bi`l-hüdâ fî-zamâni`d-dalâl*  
*Ke-bedri bidâ fî-leyâli`z-zalâm*
3. *Mu`azzam be-zât u mü`ebbed be-dîn*  
*Mükerrem be-vasf u Muhammed be-nâm*

4. Lebinünsafâdârı ke's-i rahîk  
Saçınun hevâdârı misk-i hıtâm
5. Yüzün sürdigiyçün ayagina 'arş  
Ana fark-ı kerrûbî oldı makâm
6. Şehenşâh-ı 'âlem ol âdem durur  
Ki oldı kapusunda anun gulâm
7. Umar cür'asından bu Hamdî türâb  
Kaçan suna Ahmed ehibbâya câm

### 104

1. Cemâli mushafını açdı çün nigâr-ı kadîm  
Yazıldı safha-i levh-i vücûda nakş-ı Kadîm
2. Ne turfadur ki bu nakşun sahîh iken aslı  
Kimisi kaldı sahîh ü kimisi oldu sakîm
3. Gel ey gönül ki bu nakş-ı muzahrafa kalma  
Sakîmi terk ider ol kim nazarda oldı selîm
4. Sıfât resmini koyan bilür ki zât nedür  
Hudûs nakşını yuyan bulur nigâr-ı kadîm
5. Diledi Hamdî yaza vasf-ı hon-ı rahmetüni  
Zebân-ı hâme anun lezzetinden oldı dü-nîm

### 105

1. Kaddüne ne revâdur eger nârven disem  
Gîsûna gey hatâ ola müşk-i Hoten disem
2. 'Âlem tapuna gonçe-dehen dirse nesne yok  
Hışm itdügün nedür sanemâ anı ben disem
3. Deryâ dibinde her sadefün gûşı çekile  
Dendân-ı âbdâruna dürr-i 'Aden disem
4. Dûr eyledün dürûg ile cennetden Âdemi  
Lâ'ik degül mi sana rakîb ehremen disem
5. Firdevs içinde olmasa Hamdî visâl-i yâr  
Kavl-i hasen ola ana dâr-ı hazen disem

106

1. Bir melek-tal'ata dün gice hem-âgûş oldum  
Gökde isterken anı yırde 'aceb tuş oldum
2. Bir kadeh sundı bana la'li revân nûş itdüm  
Kendümi bulmazam eyle ki bî-hûş oldum
3. Lutf idüp nâz u 'itâb ile hitâb eyleyicek  
Sözin işitmege başdan ayaga gûş oldum
4. Menzil-i şâh-ı cihân zerrece gelmez gözüme  
Gerçi kim bende-i gîsû-yı bünâgûş oldum
5. Dilde ey Hamdî melâl olsa olur dilde kelâl  
Dâr-ı hüzn anlayalı 'âlemi hâmûş oldum

107

1. Gel ey perki bugün 'azm-i sebzezâr idelüm  
Şarâb-ı köhne ile 'ayş-ı nev-bahâr idelüm
2. Binâ-yı 'ömri harâb itmedin hücûm-ı ecel  
Esâs-ı sohbet-i nev-rûzı üstüvâr idelüm
3. İçüp çemende lebün gibi bâde-i gül-gûn  
Bu 'aklı fikri saçungibi târumâr idelüm
4. Çü pîr-i meykede kıldı salâ-yı mey-hâne  
Ayagına varalum varlığı nisâr idelüm
5. Bu demde 'ârif olan mest-i câm olur Hamdî  
Humârı olmayanunadını hımâr idelüm

108

1. Rüsûm-ı saltanata yine ibtidâ iderem  
Mahallenîçre şehâ kendümi gedâ iderem
2. Küdûret ehli olan sûfîragmına sâkî  
Mey ile hâtırını sâgarunsafâ iderem
3. Nigâr meclisidür sûziş ile sâz gibi  
Nevâ idüp niçe 'uşşâkı bî-nevâ iderem
4. Bu bezm içinde gönül çâr-pâre olmazsa  
Ben anunismini hayvân-ı çâr-pâ iderem

5. Didükçe Hamdî lebün va'desi haberlerini  
Îlâhî agzuna varsun diyü du'â iderem

### 109

1. áamunı câna mugtenem bilürem  
Sensüz olan neşâtı gam bilürem
2. Her ne dem kim dem aglamaya gözüm  
Ol demi ben dem-i nedem bilürem
3. Sebeb-i derdünem dime bana kim  
Derdün em cevrünikerem bilürem
4. Harem-i kûyuna harîm olanı  
'Âlem içinde muhterem bilürem
5. Kendüyi her kim ol tamâm anlar  
Hamdî kemlerden anı kem bilürem

### 110

1. Kan aglasun şafak haber-i Kerbelâyiçün  
Mâtem libâsı geydi gice ol 'azâyiçün
2. Merdüm odur ki oldı siyeh-pûş göz gibi  
Nûr u sürûr-ı çeşm ü dil-i Mustafâyiçün
3. Gül tâcdâr-ı devr-i bahâr olsa tan mı kim  
Yırtar kabâyı mâtem-i Âl-i 'abâyiçün
4. Ey dîde göz yaşıyla suvar Kerbelâ'yı kim  
Çekdi belâ Hüseyñ dili anda mâyiçün
5. Ebr irmedi o cânibe çün bî-mecâl idi  
Aglamag ile anda olan mâ-cerâyiçün
6. Hışm itse ra'd çalsa 'aceb mi bulıtları  
Şeşîr-i berk-i hâtıf ile ol hatâyiçün
7. Ol dem bulıtlar itmedi sîr-âb teşneyi  
Cem' olsalar ne fâ'ide şimdi bükâyiçün
8. Düşmen nedür ki katline anunzafer bula  
Peşşe nedür ki per açâ sayd-ı hümâyiçün
9. Bu menzil-i fenâda velî ol kadar belâ  
Ednâ bahâne oldı bekâ-yı safâyiçün

10. Âl-i resûle Hamdî ihânet idenleri  
Recm eyle seng-i la'netünile Hudâyîçün

111

1. Kirişme ile tecellî kılup nikâbundan  
Beni yakarsın oda gâh geh 'ikâbundan
2. Lebünşarâbın umar teşne-dil ne bilsün kim  
Ölürse agzına tamzurmayasın âbundan
3. Hadeng-i gamzelerün nîşi bana nûş oldu  
Zülâl-i 'azb içerem vâdî-i 'azâbundan
4. Hemîşe dâne-i gendüm yirine 'ömr ögidür  
Figân u nâleler ey çarh âsiyâbundan
5. âurûr câmı seni eyle kıldı mest ü harâb  
Serâbı fark idemezsin gönül şarâbundan
6. Yüzün sürerse rikâbuna îmin ola felek  
Seni yüzün düşürür vakt olur rikâbundan
7. Nigâr zülfi hevâsında cân vir ey Hamdî  
Cihân meşâmı mu'attar ola türâbundan

112

1. Mâ-beynümüzde tâ ki görindi firâk u beyn  
Kan aglamak bu gözlerüme oldu farz-ı 'ayn
2. 'Âlem elem olur bana 'aynum sen olmasan  
Sensüz olursa bana ne varlık gerek ne 'ayn
3. Merd ol durur ki oynadı tecrîd nerdini  
Elden salup dü 'âlemi mânend-i ka'beteyn
4. Mihrâb-ı ebruvânunı 'arz eyle ey sanem  
Makbûl secde itmek için ehl-i Kibleteyn
5. Kem cür'a ile Hamdî'ye bir keyf virdi 'ışk  
Kim ân u în görünmez ana keyf-i keyf ü eyn

113

1. Şeh-i şehri-i melâhat olmuşsın

Mihr-i subh-ı sabâhat olmuşsın

2. Çeşm ü ebrûda ‘ayn-ı âfetedün  
Kâmet ile kıyâmet olmuşsın
3. Zülf ile hâl ü kadd ile ebrû  
Nakş ile câna sûret olmuşsın
4. Ey vücûdını mahv iden ‘âşık  
Yâr ile di ne halvet olmuşsın
5. ‘İşk ile ger melâmet oldun ise  
Hamdî gamdan selâmet olmuşsın

#### 114

1. Ol gözleri ugrı ki ugurlandı gözümden  
Ol benden ayak çekdi ben el çekdüm özümden
2. Hasret odına eyle göyindürdi beni kim  
Odlar saçılır ‘âleme göynüklü sözümden
3. Başumda karâr eyleyeli zülfi hevâsı  
âayret suyu kalmadı revân oldu yüzümden
4. Âvâre iken zülfi hevâsında ölürsem  
Müşkîn ola her yıl ki güzer kıla tozumdan
5. Ol hatt ile ruhsâra ırag olalı Hamdî  
Seyr-i çemen ü âb-ı revân çıkdı gözümden

#### 115

1. Devr-i zülfünde harâb oldu gönül bî-dâddan  
Dâd elünden kim beni yâd eylemezsın dâddan
2. Sîm-i hâlisden yaradan kâlebüni ey sanem  
Kalbünü yâ Rab nedendür eylemiş pûlâddan
3. Nakş-ı Şîrîni giderdi seng-i hârâdan felek  
Mümkün olmadı gidermek hâtır-ı Ferhâd’dan
4. Âh kim âhum harâb itdi vücûdum mülkini  
Ey niçe ma’ûmlar vîrân ola ol bâddan
5. Dil-berün çün vaslına irmek müyesser olmadı

Hamdî miskîne ne hâsıl nâle vü feryâddan

**116**

1. Çöz sünbülünü Rûm diyârı Hoten olsun  
Gül incü dişün şevkına ‘âlem ‘Aden olsun
2. Ol yıl ki eser lutf ile kûyuntarafından  
Cân virdi niçe mürdeye sag u esen olsun
3. Cân virür asılmaga gönül miskin önünde  
Dek boynına zülfüngibi miskîn resen olsun
4. Her kim semeni sînene benzetmez olursa  
Ana yaraşur tâze semenden kefen olsun
5. Mîm-i dehen-i yâr olalı dil-i Hamdî  
Yog oldı yitüp yoga bulunmak neden olsun

**117**

1. Hoş bûy gelür hâlini ansan suhanundan  
Ey dil koma bu habbe-i miski dehenünden
2. Ey sûret-i yâr aglayıcak çıkma gözümden  
Su çıkdı diyü kaçma inen de vatanundan
3. ‘Âlemde günü derd ile eyvâyile geçsün  
Cân mîvesi bihdür diye her kim zekanundan
4. San perde-i cândan görünür nûr-ı İlâhî  
Nâzûk bedenün kim görünür pîrehanünden
5. Yokcân u gönül bende sana virmege lâyık  
Yok yire hemân bûse umaram dehenünden
6. Hamdî lebi şevkından ölürsen o perînün  
Cân bûyın ala cümle melekler kefenünden

**118**

1. Sun ey sâkîmey-i bâkî yine câm-ı tecellâdan  
Anun bir cür’ası yigdür bana bin zühd ü takvâdan
2. Ben ol zerk ehline ‘âkem ki zühdin ‘arz idüp halka  
Keser yinini vü kesmez elini meyl-i dünyâdan

3. Zihî lutf ehli dil-ber kim bu vîrân gönlüme her dem  
Tesellîler ‘ayân eyler temâşâ-yı tecellâdan
4. Şehâ ‘ışkun koyup nefsi hevâsın isteyen senden  
Niyâzında piyâz ister usanup menn [ü] selvâdan
5. Belâ-yı ‘ışk ile ol kim ‘ukûbetler geçürmişdür  
Ne korhu ana ey Hamdî ‘ikâb-ı dâr-ı ‘ukbâdan

### 119

1. O kim nûş itdi ‘ışkun şerbetinden  
Yavu kıldı vücûdın hayretinden
2. Yüzi ag olsun anunkim berîdür  
Kara gönüllü sûfîsohbetinden
3. Ne var da’vâ-yı gaybet kılsa sûfî  
Bilürüz hâlin anungıybetinden
4. Cihânunpâdişâhı ol kişidür  
Ki fârig oldı mâl ü milketinden
5. Felek Hamdî`ye bir şerbet içürdi  
Ki bîzâr oldı cümle lezzetinden

### 120

1. Öper güzeller agzın ider mey bahânesin  
Hoş devr ile geçürdi piyâle zamânesin
2. Nakş-ı zamâne bağlasa zühre terânesin  
Pür-sûz iderdi sâzıyile tâziyânesin
3. Meyl ide nev-cüvândur ok ata diyü gönül  
Nakş itdi hûn-ı sürh ile ta’lîm-hânesin
4. Eyle harîsdür işigüne bu dîde kim  
Bir çâre bulsa yire düşürmezdi dânesin
5. Göricek itün izini vây kim sevindi dil  
Müflis beş akça buldı bir arada sanasın
6. Hamdî`ye dost kayusu cân anma ey gönül  
Sen de getürme ortaya bu oda yanasın

### 121



1. Hurrem o gönül kim geçe ‘âlem hevesinden  
Hoş dem sürer ol tûtî ki uçdı kafesinden
2. Bîgâne birincin yime kim renc ü belâdur  
Cân kûtıdur ayrılma Halîl`ün ‘adesinden
3. ‘Âkil yitürür menziline rûhı süvârın  
Anı bilür âhir düşiserdür feresinden
4. Dildâra kaçan ire kaçan cevr ü cefâdan  
Nûra ire mi eymenen Eymen kabesinden
5. Balına tama’ barmagını banmadı dehrün  
Ey Hamdî o kim kaçdı belâ-yı megesinden

## 122

1. Nasîbi olmayan şevk-ı ezelden  
Kaçan hazz eyleye şi’r ü gazelden
2. Nigâristân-ı Çînî bâtlı oldu  
Nigârun Hak yüzi nakşın yazaldan
3. Güzelden ol kadar gördüm cefâyı  
Ki çıkdı aqlamag ile göz elden
4. Meşâm-ı ‘âlemi kıldı mu’attar  
Seher yili saçun ‘akdin çözelden
5. Dirîgâ lâ-yezâlî mihnet imiş  
Sana ey Hamdî kısmet Lem-yezel`den

## 123

1. Gitdi nigâr u kaldı bana yâdigâr hüzn  
Tutdı karâr u itdi beni bî-karâr hüzn
2. Zülf ü ruhından ayrılalı gam-güsârumun  
Oldı havâle cân[um]a leyl ü nehâr hüzn
3. Cân mülkini harâba virürse ‘aceb midür  
Dil şehrine çün oldu bugün şehryâr hüzn
4. Hecrinde sanma râhat olup bir nefes gülem  
Ansuz cihânda eylemişem ihtiyâr hüzn
5. Dîvâne olma şi’rünü dîvân u defter it

Ey Hamdî gerçi kıldı seni târumâr hüzn

**124**

1. Sensüz nicedür tende bu cân işte bilürsin  
Ten nice kalur gitse revân işte bilürsin
2. ‘Uşşâka inen cevri ü cefâ eyleme ey dost  
Kalmaz kişiye devr-i zamân işte bilürsin
3. Ben teşneye zulm eylesün la’lüne hey di  
Anunla nedür ‘ahd-i nihân işte bilürsin
4. İnletme beni rahm idüben hâlüme ey dost  
Âhumla yanar cümle cihân işte bilürsin
5. Aldanma inen ‘ömr bahârına i Hamdî  
Bir gün irişür bâd-ı hazân işte bilürsin

**125**

*mefâ’ilün mefâ’ilün*

1. Çün olmaz vasluna çâre  
Gidelüm bârîşehründen  
Kapundan oldug âvâre  
Gidelüm bârî şehründen
2. Gönül sensüz müşevveşdür  
Yanar bagrı pür-âteşdür  
Çü sabr olmaz sefer hoşdur  
Gidelüm bârî şehründen
3. Saçun bâd ile yâr oldı  
Anunçün târumâr oldı  
Dil andan bî-karâr oldı  
Gidelüm bârî şehründen
4. İçüp kanumuzı kandun  
Bizi yüz döndüre sandun  
Çün âhir bizden usandun  
Gidelüm bârî şehründen
5. Düşürdün bizi bir bende  
Ki düşmenler kılur hande  
Terahhum yog imiş sende  
Gidelüm bârî şehründen
6. Yazarken hüsnüni hoşter

Kılurken medhüni defter  
Bizi redd itdün ey dil-ber  
Gidelüm bârî şehründen

7. Görelden sen semensâyı  
Bu Hamdî oldı rüsvâyî  
Çekince bunca gavgâyı  
Gidelüm bârî şehründen

## 126

1. Ben garîbi nola ey dost eger yâd idesin  
Bend-i gamdan bu esîr olmışî âzâd idesin
2. Hüsnüne gırre olup ‘âşıkâ cevır itme inen  
Bir gün ola ki benüm bu sözümi yâd idesin
3. Leb-i şîrînüni bu lutf ile ‘arz eyler isen  
Ey niçe ‘âşık-ı bî-çâreyi Ferhâd idesin
4. Yâr-ı gül-çihre ile ‘îş-i bahâr eyle gönül  
Niçe bir derd ile bülbül bigi feryâd idesin
5. Pîr-zâde sana ol dem dinilür [ey] Hamdî  
Ki bu âzâdeligi Hak yolına zâd idesin

## 127

1. ZihîMecnûn ki nâ-pervâ safâ-yı vasl-ı Leylâ'dan  
Zihî ‘âşık ki müstagnîtemâşâ-yı tecellâdan
2. Cemâl-i lutfâ her lahza teferrüc eyleyen ‘âşık  
‘Aceb mi olmasa hazzı eger ma’şûk-ı zîbâdan
3. O kim pertâb ider himmet okın meydân-ı ‘irfânda  
Geçürmez sa’y ile hergiz nişânı “mâ-arefnâ”dan
4. Mükahhal olmayan gözler ‘inâyet tûtüyâsından  
Mukarrerdür ki olmaz ol münevver nûr-ı Mevlâ'dan
5. Ne çeşm olsun o kim bakmaz cihâna nûr-ı Hakk ile  
Ne şey olsun o kim görmez o nûrı cümle eşyâdan
6. Ne bilsün tîh-i gafletde olanlar minnet-i menni  
Piyâz ehli olan ‘âmî ne hazz eyleye selvâdan
7. Fenâ fakrıdur ey Hamdî “sevâdü’l-vechi fi’ d-dâreyn”  
Yüzi ag olsun anun kim başında var bu sevdâdan

128

1. Hırs-ı vuslat düşürür fûrkate ‘uşşâkı kamu  
Hoş dimişler ki tama’ olmasa olmazdı tamu
2. Zülfün öldürdi beni la’lünü nûş eyler iken  
Gerçi dirlerdi yılan sokmaz içerken kişi su
3. Dost dîdârını cân göziyle görelî dil  
Bî-karâr oldu akar su gibi her sûy-be-sû
4. Çîn-i gîsû-yı nigârun seferinden gelicek  
Şemme-i bûy o mûyidi sabâ senden umu
5. Sûfiye Hamdî yaraşurdu siyeh-pûş olmak  
Kahr ile nefsin idinseydi gulâm-ı Hindû

129

1. Görmeg için gün yüzünü rû-be-rû  
Geşt ider etrâfı gezer kû-be-kû
2. Kılca miyânundan eser bulmazam  
Arar isem varı yogı mû-be-mû
3. Görmedi serv ol kad-i dil-cû gibi  
Su gibi bu gönlüm akup sû-be-sû
4. ‘Âleme bahş itdi sabâ bûyunı  
Viridi yile bilmedi bu bûyı bu
5. Def gibi ey Hamdî tehî-dil olan  
Hem-dem olur yâr ile hem rû-be-rû

130

1. ‘Aceb mi dâg kosa lâleler ciger üzre  
Felek bitürdigiçün hârı verd-i ter üzre
2. Safâ-yı handesine bakma şem’un ey ‘âkil  
Gel agladugımı gör od yakılsa ser üzre

3. Belâ nişânesi ‘âşık yüzinde hoş yaraşur  
Nite ki sikke-i şâhî yazılsa zer üzre
4. ‘Aceb mi pîreheni çâk olsa ol sanemün  
Ki düğmesini anun düğmeler kamer üzre
5. Hayât-ı fânide râhat gözetme ey Hamdî  
Kişi ne denlü huzûr eyleye sefer üzre

### 131

1. Bitmez lebi yâkûtî gibi kânlar içinde  
Yokdur şeker agzı gibi dükkânlar içinde
2. Bu gül gibi açılmadı gülzâr arasında  
Ol serv gibi bitmedi bustânlar içinde
3. Gözüm yaşı ile cigerüm kanı uyuşdı  
Vardı yolına düşdü yatur kanlar içinde
4. Yûsuf gibi kim çâh-ı belâ kahrı çekerse  
Tartılsa nola la’l ile mîzânlar içinde
5. ‘İşkun odı gökden inicek yakmaga ey dost  
Hamdî’yi kabûl eyledi kurbânlar içinde

### 132

1. İt rakîbi niçe bir bağlayasın har yirine  
Öldür ey gâzî demidür anı kâfer yirine
2. Her gönül tâ’iri kim ‘ışk hevâsında uçar  
Nola ger ferr-i sa’âdet bitüre per yirine
3. Bûse cerr eyleyicek sûhte-dil dil-berden  
Didi lâ-yunsarifem koma beni cer yirine
4. Çün zer ü sîm ile biter didiler cümle murâd  
Varayın yâre yüzüm alup ele zer yirine
5. Bir cemâl ile görindi bana ol dil-ber kim  
Dahı şevkından oturmaz bu dil ü ber yirine

### 133

1. Ta’n itme sûfibana gam-ı yârum üstine

Sevdâyî ‘âşıkam ko beni kârûm üstine

2. Cân haste düşdi kanı nesîm-i diyâr-ı yâr  
‘Îsî gibi nefes ide bîmârûm üstine
3. Gördi yüz urdum aglayu dîvârına didi  
Zer yaraşur ki zâr ola dîvârûm üstine
4. ‘Ahdüm budur ki gamzesi üstinde cân virem  
‘Ahdüm sımazam ölürem ikrârûm üstine
5. Her gice cân sipendin ışiginde yakaram  
Yavuz göz irmesün diyü dildârûm üstine
6. Hamdî mu’âmelem olıcak yâr ile nihân  
Cânûm da istemen gele bâzârûm üstine

### 134

1. Hüsnün beni gark eyleyeli nûr u ziyâya  
Kalmadı tanum şâm u seher mihr ile aya
2. Sünbül saçuna nisbet ider bûyımı ‘anber  
Kanı kurıdı müşk-i Hıtâ`nun bu hatâya
3. áamzen bana kasd itse rakîb araya düşer  
Kan ola gibi girdi o şeytân çün araya
4. Tâli`lü gönüldür irişen zülfine yârun  
Zî murg-ı sa`âdet ki kona burc-ı hümâya
5. Togrıldı ruh-ı yâra gönül muztarib iken  
Benzetsem anı râst ola kible-nümâya
6. Dîdârına hâ`il olamaz zülfi hicâbı  
Gün gündür eger girse dahı kara ‘abâya
7. Hamdî`ye söğüp gayra nüvâzişler ider dost  
Zî ni`met anun kim irişe hâss-ı du`âya

### 135

1. Gül haberi geldi meger bülbüle  
Toldı cihân velvele-i gulgule
2. Gûş ide mi bülbüli nûş itmeyen

Dil-ber-i gül-çihre ile bülbüle

3. Hâline öykündüğüçün dil-berün  
Ger döğülürse yiridür fülfüle
4. Hamdî figân eylese ol gül güler  
Aglasa bülbül yaraşur gül güle
5. Sohbet-i gül kısmet-i hâr olalı  
Nâle nasîb oldı hemân bülbüle

### 136

1. Kim Züleyhâ gibi ‘ışk ile kıyar mâ-meleke  
Mâlik olsa nola Yûsuf gibi zîbâ meleke
2. O perî lutf u bahâda o kadar buldı rüsûh  
Olmadı o meleke dahı o denlü meleke
3. Sensin ol nûr ki meh-tâb-ı cemâlün ‘aksi  
Güneş oldı düşüp âyîne-i cirm-i feleke
4. Kir getürdi yüzine öykineli alnuna ay  
Bî-edeb olanun olsa nola alnında leke
5. Agzuma gelmedi cân pîş-keşündür dimege  
Dil kaçan lâ’ik ola Hamdî o şâha beleke

### 137

1. Gönlümi aldı lebün kasd eyledi cân üstine  
Vey ne hûnîdür ki kan itmek diler kan üstine
2. Hüküm [idüp] cân ister isen benden ey şâh-ı cemâl  
Yoluna bir cân nedür bin cân virem cân üstine
3. Sîneme geldükçe gamzen tîri cânâ korkaram  
Münkesir ola irüp peykânı peykân üstine
4. Cism-i mercân cân bulup yâkût ola kût-ı revân  
Düşse ‘aksi la’lünün yâkût u mercân üstine
5. Çeşmiyile Hamdî`nünbaşı hoş olmazdı meger  
Sûret-i dil-ber yazılmasa bu giryân üstine

### 138

1. Bir gazel nazm eyledüm mâh-ı niğârîn üstine  
Görse zühre baglar anun nakş-ı rengîn üstine
2. Didi al ‘ışkum hevâsını didüm baş üzre hoş  
Didi yaz nakşum didüm çeşm-i cihân-bîn üstine
3. Kâfir olduğına ol bî-dâd zülfi dil-berün  
Dâldür bu kim komışdur pâyını dîn üstine
4. Öykinimez fark-ı yâr üstinde müşkîn perçeme  
Çıksa keyvân-ı Habeş eyvân-ı sîmîn üstine
5. Dil-berün zülfi perîşân hâli üzre gûyiyâ  
Hâ-i hayretdür ki düşmiş Hamdî miskîn üstine

### 139

1. Bu kadd ü kâmet ile gelse tapunkıyâma  
Her kim görürse eydür “kad kâmeti’l-kıyâme”
2. Kevser lebünsıfâtı lezzetde ol kadardur  
Kim ney-şeker olupdur yazarken anı hâme
3. Bezmünde mest olanlar çâk itdi câmesini  
Cânâ[n] meger cemâlün ‘aksin düşürdi câma
4. Ger tavk u efser ile ‘ârif olursa sûfî  
Sîmurg-ı ‘âlem imiş her hüdhüd ü hamâme
5. Vuslat kapısı fethin Hamdî tapundan umar  
Devlet hemîşe şâhum begden olur gulâma

### 140

1. Nâr-ı ‘ışkunla kebâb oldu gönül döne döne  
Çeşm-i mestünle harab oldu gönül döne döne
2. Beni korkutma cefâ bahrini cûşa getirüp  
Ki bu deryâda habâb oldu gönül döne döne
3. Âteş-i cevrine devrännola sabr eyler isem  
Yanup odlara türâb oldu gönül döne döne
4. Seni yıkmak dileyüp yaptı rakîbün evini  
Felekün işi harâb oldu gönül döne döne
5. Hamdî ol gonca-lebün âb-ı hayâtın içeli  
Hızrveş şeyh ü şebâb oldu gönül döne döne



### 141

1. Kaddün 'alemi göstereli peyker-i fitne  
Cân kişverini gâret ider leşker-i fitne
2. Ma'mûr ideli bâg-ı cemâli yed-i kudret  
Bitürmedi kaddüngibi bir 'ar'ar-ı fitne
3. 'Arz id yüzünü suhf-ı cemâli okusunlar  
Çöz zülfünü kim şerh olına defter-i fitne
4. Dir halka-i zülfünde ruhun görse müneccim  
Bu devr içinde görünür ahter-i fitne
5. Ham kılmış idi kaddümi çenber bigi zülfün  
Olmamış idi çarha dahı çenber-i fitne
6. Çün fitne imiş 'âleme güftâr-ı mahabbet  
Açma dehenün Hamdîyapılsun der-i fitne

### 142

1. Vardı elüm irişmedi ol serv-kâmete  
Eyveh nidem ki kaldı bu hasret kıyâmete
2. İtsün katîl-i gamzesine nâz-ı bî-hisâb  
Zîrâ hisâb yok durur ehl-i şehâdete
3. Sa'y ile vasl-ı yâra kimesne irişmedi  
Tâli' gerek ki tâlib ola ire devlete
4. Bir kılı Mânî kırk yarup kılrsa kıl kalem  
Yazmaz miyânı nakşını tahsîn bu dikkate
5. Geçdi nigâr u Hamdî izine yüzün sürer  
'Ömri geçe irişmeye bu denlü devlete

### 143

1. Ey gönül cân vir yine cânânuna  
Derde düş kim iresin dermânuna
2. Didüm ey dil-ber lebüne teşneyem  
Didi miskîn susadun mı kanuna
3. 'Ömrümün tûmârını dürdüm şehâ

Yazılınca defter ü dîvânuna

4. Kâmeti çevgân olur ‘âşıklarun  
Top olunca başları meydânuna
5. Vaktidür Hamdî yakasın çâk ide  
Çünkü irişmez eli dâmânuna

**144**

1. Hecründe beni eyle hazîn eyledi ey şâh  
Hâlümi görüp kûyun iti didi ki veh vâh
2. Pür-havf u hatardur didiler ‘ışk yolını  
‘Azm eyledüm ol yola “tevekkeltü ala’llâh”
3. Gerçi rakîb âhuma nâzır degül ammâ\*  
Tîr olur anun cânına âhir elif-i âh
4. Başum ele alup didüm ey dil-ber-i hûn-rîz  
“El-abdü ve mâ-fî-yedihi kâne li-mevlâh”
5. Umar ki saçun dârına Hallâc ola Hamdî  
Bahtı ona şâyed niteki kıssa-i cûlâh

**145**

1. Öldüm de dirse bakma rakîbün figânına  
Kelb ölüsidür degmez ülüsi şüvânına
2. Peykânların i gamze okı sıhhat âbıdur  
Sun ol sudan bu hastelerün girme kanına
3. Yârı yanına ‘âşık olan kanda irişür  
Karbân ide özin meger anun kemânına
4. Fânîmetâ’a virme gönül nakdini [sakın]  
Bâzâr olur ki assısı degmez ziyânına
5. Ger mülki olsa cân u gönül Hamdî miskînün  
Vakf eyler idi anları yâr âsitânına

**146**

1. Virelüm zühdi bâda bâdeyile  
İçelüm bir ‘izârı sâdeyile

2. Ey perîruhlarundaki hâlün  
Şehleri mâî ider piyâdeyile
3. Rûşen eyler cihâmı mâh-ı münîr  
Mîhr-i hüsnünden istifâdeyile
4. Zülf-i dil-ber fütâde olduğıçün  
Başı hoşdur dil-i fütâdeyile
5. Hamdî kanın helâl sandı rakîb  
Ben nidem ol harâm-zâdeyile

**147**

1. Ol gün ki nâzın eyleye dil-ber hisâb ile  
Rûz-ı hisâb olur bana ol gün ‘azâb ile
2. Yüzine karşı gün nice da’vâ-yı hüsn ider  
Zerre kaçan mukâbil ola âfitâb ile
3. Dil-ber kenâra gelse karâr eylemez gider  
Eyveh nidem ki gitdi [bu] ‘ömrüm şitâb ile
4. Âhum işitse muztarib olup kaçır rakîb  
Recm eylerem meger o recîmi şihâb ile
5. Hamdî cihânda kalbünü ol dil-rübâyâ vir  
Kim hüsnî zâ’il olmaz anuninkılâb ile

**148**

1. Gönlümü bend itdi uydı gamze-i gammâzuna  
Hey di hey zulm itmesün zülf-i kemend-endâzuna
2. Dil-berâ ol serv-kâmetsin ki erbâb-ı nazar  
Mîve-i râhat okurlar şîveyile nâzuna
3. Âh-ı sînemden ‘izârun âsmânîler düzüp  
Yakdı mâhı mihr ile tahsîn ol âteş-bâzuna
4. Sîneme sâzun teşebbüh eylemiş mutrib senün  
Gûş-mâl itmek anunçün lâ’ik oldı sâzuna
5. Hamdiyâ gülşende medh itsen dehân-ı dil-beri  
Aguz açup goncalar hayrân olur âvâzuna

149

1. Zülfün ki âfitâba hicâb itdi ebr ile  
âam zulmetinde cânâ ‘azâb itdi cebr ile
2. ‘Unnâb-ı leblerün var iken ey tabîb-i cân  
İtme ‘ilâc hastelere acı sabr ile
3. Hem-sohbet oldı yine rakîb ile ol sanem  
Îmânı olsa hem-nefes olmazdı gebr ile
4. Hamdî cihânda ehl-i basîret olanlara  
Sâhib-serây bir görünür ehl-i kabr ile

150

1. Hâsiyyet-i ‘ışkı bilemez kimse kemâhî  
Mâhiyyet-i mâyı bilemez niteki mâhî
2. Fettâh-ı ezel ‘ışk-ı ebeddür kim ezelde  
Harc itdi açup ‘âleme gencîne-i şâhî
3. ‘İşk oldı sebep mazhar-ı eşyâya zuhûra  
‘İşk ile bulur her ki bulur zât-ı İlâhî
4. Keşşâf ile keşf olmadı esrâr-ı mahabbet  
Tavzîh ile îzâh idemez kimse bu râhî
5. Yâ Rab ne ‘aceb perdededür nagmesi ‘ışkun  
Kim şevkı anun raksa koyar mihr ile mâhî
6. Hüsn ile budur güller açan sahn-ı çemende  
Lutf ile budur tâze kılan cümle giyâhî
7. Dâg-ı cigerüm lâle gibi zâhir olupdur  
‘İşk ile yile vireli tâcı vü külâhî
8. ‘Âşık ki anun dil-beri ‘ışk-ı ebedîdür  
Şevkına zevâl irmez ü zevkına tenâhî
9. Çün ‘ışkı bilen ‘âşıkı ma’sûk okumışdur  
Bu Hamdî`ye gayretdür ide gayra nigâhî

151

1. Şu cân ki gûşına girmez ulularun nefesi  
O ‘âsinün yiridür mihnet ü belâ kafesi

2. Şu kim kulagina asmadı pend gevherini  
Asılsa boynına anun yaraşa har ceresi
3. Har-ı melâmete binse ‘aceb midür ol kim  
Yire urup durur anı sa’âdetün feresi
4. Zamâne kulzûminün turfadur temevvüci kim  
Güherleri yire urup götürdi hâr u hası
5. Bu hâle vâkıf olan bu zamânda ey Hamdî  
Kodı hüner sözini belki çıkmaz oldı sesi

### 152

1. Tecellî itmese dil-ber cemâli geh gâhî  
Yakardı ‘âlemi odlara ‘âşıkun âhı
2. Cihânı bahr-ı tecellî muhîtdür cümle  
Gören velî bilimez mâyı niteki mâhî
3. Su gibi yüz sürici bî-karâr olan ‘âşık  
Ki katresini muhît idüp ola âgâhı
4. O cân kim oldı belâ seyli yolına hâşâk  
Muhîte irse ‘aceb mi vücûdınun kâhı
5. Zer it nuhâsumı iksîr-i ‘ışk ile Hamdî  
Ki lâ’ık ola ana vaz’-ı sikke-i şâhî

### 153

1. *Tâ der-keşîd sahn-ı zemîn erba’în-i dey  
Peydâ şod în murakka’-i âlûde-reng-i vey*
- 2 Subhun nesîmi mürdeleri zinde itmege  
‘Îsî gibi seyâhata başladı hay-be-hay
3. *Hûn-ı belâ be-dîde uşşâk tâbe-çend  
Dâğ-ı cefâ be-sîne-i müştâk tâbe-key*
4. *Bâ-kayd-ı hod kesî-ne-resed sûy-ı âşıkî  
Çün şart-ı âşıkîst şoden lâ-be-şart-ı şey*
5. *Çevgân-ı zülf-i dost çünân berd gûy-ı ser*

**154**

1. ‘Âlem içinde olmasa ölmek elemleri  
Sürmek olurdu zevk u safâyile demleri
2. Mâr-ı cefâsı mûr gibi çok zamânenün  
‘Ankâ gibi bulunmaz egerçi keremleri
3. Şâdîsi bî-karâr ise dehrün kayurma kim  
Sâbit degül durur ferahı gibi gamları
4. Aldanma ‘izzetine cihânun ki ‘âkıbet  
Hor u hakîr itdi nice muhteremleri
5. Her câna kim safâyile şerbet suna felek  
Âhir ana çanak çanak içürdi semleri
6. Devrân elinden âh u figân eylemek durur  
Şâm u seherde bülbül-i şeydâ negamları
7. Devr-i bahârün agladugıdur fenâyiçün  
Her gice gül yüzine düşen jâle nemleri
8. Magrûr olma saltanat-ı bî-sebâta kim  
Hâk oldı câm eylediler niçe Cemleri
9. Seng eyledi zamâne niçe Husrev'ün tenin  
La'l oldı mihnet ile olan bagrı demleri
10. Gûşında la'l oldı Husrevlerün budur  
Yâd ideler o demleri olsa sitepleri
11. Kılma nazar tarâvet-i dünyâya Hamdî kim  
Virdi felek yile niçe bâg-ı İremleri

**155**

1. Görürse Ka'be yüzün çâk ide câmesini  
Figân u nâle ile ürküde hamâmesini
2. Cemâli vaz'ını bulmaz o mihr-i zer-pûşun  
Düzüp bozarsa ne denlü kamer ‘imâmesini
3. Hâlel ire dimesem dildeki sihirlerden  
Yürece sokmak olur idi dost nâmesini
4. Nesîm yolına kurbân olurdu âhû-yı müşk

İletse Çîn`e nigârun şemîm-i şâmesini

5. Nizâm-ı nazmunı ey Hamdî Kâtibî görse  
Düşüre mest olup câmı gibi hâmesini

### 156

1. Sidre kaddi üzre yârun Müntehâdur perçemi  
Gûyiyâ genc üzre yatur ejdehâdur perçemi
2. Hâli gibi niçe miskîn sâyesinde hoş geçer  
Ferr-i ‘âşık arturur perr-i hümâdur perçemi
3. Hüsn Bagdâd`ında yâr oldı halife bî-hilâf  
Bu ‘alâmetdür ki ‘Abbâsî-livâdur perçemi
4. Uzadur ta’na zebânın Sidrenün tâvûsına  
Nârven tûtîsi dinmek ne revâdur perçemi
5. İstivânun hattı Ka’be üzredür dimiş hakîm  
Râstîdür yâr üzre hatt-ı istivâdur perçemi
6. Hamdî Mûsî`nün yed-i beyzâsı mıdur hüsn-i yâr  
Anda geh ejder görünür geh ‘asâdur perçemi

### 157

1. Kemân-ı şîveden atdukça nâvek-i nâzı  
Nişâne sînemi kıl cânun için ey gâzî
2. Gönül kebûteri âhum hevâsıyile uçar  
‘Aceb mi evc-i felekden geçerse pervâzı
3. Düşürmeyince terâzû-yı ‘aklı oynatmaz  
Ne turfadur resen-i zülf-i dost cân-bâzı
4. Kemâl-i ‘ışk ile bakmasa dîde-i Mahmûd  
Teferrüc idemez idi cemâl-i Ayazı
5. Belâsuza eser itmez figânı Hamdî`nün  
âurâba hoş mı gelür bülbülün ser-âgâzı

### 158

1. Ne benefşe bulunur ol zülf-i ‘anber-bû gibi  
Ne çemende serv olur ol kâmet-i dil-cû gibi

2. Hoş yaraşmışdur ol ak yüz üzre bu zülf-i siyâh  
San serîr-i ‘âc üstinde şeh-i Hindû gibi
3. Leblerün balın ‘adûlar nûş iderken dostum  
Ne belâdur kim bana gamlar üşer aru gibi
4. Sürinür mahbûb zülfüne güzer itse sabâ  
Hûblar görse sürinmek ana eski hû gibi
5. Her ki yapılmak dilerse işigine dil-berün  
Bir ayag üstine tursun hıdmete kapu gibi
6. Her kime kim hem-dem oldıysa hevâ-yı zülf-i dost  
Kaldı bir kuru deride nâfe-i âhû gibi
7. Hamdî cismün hâk idince gerdiş-i âteş-mizâc  
Yüzün üstine hevâ yolında sürin su gibi

### 159

1. Reng-i gam-ı cihândan eger olsa dil berî  
Levh-i vücûda yazar idi nakş-ı dil-beri
2. Her ‘âşıkun vücûdı ki kurbân-ı ‘ışk ola  
Ana hilâl-ı ‘îd olur yârı hançeri
3. Kaddine serv gibi sanavber baş egmedi  
Bu ince şehir oğlanıdur ol yaban eri
4. Zülf-i nigâra el uzadaldan sabâ yili  
‘Âlem içinde kalmadı bir turacak yeri
5. Müşkîn saçına nâfe-i Çîn kandan öykinür  
Bu tâze ter benefşedür ol bir kuru deri
6. Pend itme vâ’iz od ile göynüklü Hamdî`ye  
Korkutma hevl-i âteş ile bu semenderi

### 160

1. Her dil ki sevdi sen sanem-i sîm-sâ’idi  
Yârı sa’âdet oldu vü devlet müsâ’idi
2. Da’vâsınun sübûtına hâcet degül şühûd  
Ol ‘âşıkunki sencileyin ola şâhidi
3. Eyveh nidem ki nâme-i şevkum haberleri  
Kasd eyledi ki oda yaka cümle kâsıdı



4. La'lün şarâbı şevkına sad âferîn kim ol  
Mestâna meze eyledi evrâd-ı zâhidi
5. Ey Hamdî çün salâh degül mûcib-i felâh  
Câm-ı mey al elüne ko bu fikr-i fâsidi

### 161

1. Her ki toldurdu mey-i 'ışk ile dil şîşesini  
Mest olup virdi yile 'âlemün endîşesini
2. Cûy-ı eşk ile figân idici dülâb eyler  
Ol dırahta ki ura dost gamı tîşesini
3. Sûfî sen serve sücûd itmese tan mı sanemâ  
Büt idüpdür özine zerk u riyâ pîşesini
4. Her ki 'âlemde anun san'atı dil-ber gamıdur  
Unıdur cümle murâdı yanılır pîşesini
5. Nâm u nâmûsı belâ bildi çü Hamdî özine  
Seng-i 'ışk ile sıdı gayretinün şîşesini

### 162

1. Zülfün hevâsı depredele bâd-ı sahtını  
Yillere virdi niçelerün tâc u tahtını
2. Didüm lebinî sorar iken kâmetün nedür  
Didi ki yi yimişini sorma dırahtını
3. 'İşkî tarîki tâcirinün assısı budur  
Çeşmi harâmîsine vire gönli rahtını
4. Germ olup âh-ı serdiyile nerm-dil geçer  
Gör zerk ü hîle sûfîsinünrûy-ı sahtını
5. Hamdî anun ki künc-i huzûr oldu meskeni  
Nider zamâne şehlerinün genc ü bahtını

### 163

1. O kim Yûsuf gibi çekdi belâ-yı çâh-ı Ken'ânı  
Yiridür ger ola Mısr'un 'azîzi belki sultânı
2. Zihî 'âşık ki ma'sûkı yolına mûr olam diyü

Hevâ yiline virmişdür niçe taht-ı Süleymân`ı

3. Nigârâ tâze la`lünü Hudâ lutfıyla ter tutsun  
Revân oldukça `âlemde şehîd-i gamzenün kanı
4. `Aceb zülfün çelîpâsı ne sûretten görindi kim  
Perîşân itdi sevdâsı huzûr-ı pîr-i San`ân`ı
5. Düşürmişdür zenehdâna gönül seyyâhını çeşmün  
âarîbün gözi bagludur ne bilsün çâh-ı mihmânı
6. Üşenmez tîg-i gamzenden gönül agzuna cânım dir  
Gör ol miskîni havf itmez meger kim yok durur cânı
7. Hemîşe nakşını mîmün gönülde hıfz ider Hamdî  
Meger benzetdi bu bî-dil dehân-ı dil-bere anı

#### 164

1. Andan evvel kim harâbât-ı cihân ma`mûr idi  
Câm-ı vahdet cur`asından cân u dil mahmûr idi
2. Yaşı çoğ olsun `aceb insân-ı kâ mildür gözüm  
Kim ezelden manzar-ı dil-ber ana manzûr idi
3. Bulmadın Mûsî hitâb-ı “len terânî”den cevâb  
Pertev-i hüsnütecellîsine gönlüm Tûr idi
4. İrmedin Nûh'a dahı fülk-i `inâyetden necât  
`İşkununtûfânına sînem benüm tennûr idi
5. Çâh-ı Bâbil'de dahı Hârût u Mârût olmadın  
Gözlerünsihriyile cân u gönül meshûr idi
6. Gelmedin Furkân ile İncîl ü Tivrît ü Zebûr  
Safha-i suhf-ı cemâlün `âşıkâ mezbûr idi
7. Vakti olmadın dahı in`âm-ı `âmun `âleme  
Sohbet-i hâsunda Hamdî'ye tapun meşkûr idi

#### 165

1. İ gâfil gözleme şugl-ı cihânı  
Kalur sanma sana bu milk-i fânî

2. Nolur şol dirüben dişürdügüzden  
Ecel kime virür bir dem amânı
3. Kanı bu dünyeye sultân olanlar  
Koyuban gitdiler her bir nişânı
4. Kara kirpüklü gözler hâke batmış  
Gümişden tenlerüngitmiş revânı
5. Sarı saçlar yirinden külli kopmuş  
Çeyanlar yimiş ol şekker zebânı
6. Gel imdi bu sini ‘ibret gör imdi  
Harâb itmiş nice sâhib-kırânı
7. Mücellâyiken ol cevher bedenler  
Te’âruz eylemiş çerhun çeyânı
8. Melikler tâcını başından almış  
Bozulmuş haymesinün haymedânı
9. Sanasın ejdehâdur agzın açmış  
Yudar bir bir gelen pîr ü cüvânı
10. İ Hamdî gâfil olmagıl hazerden  
Gelür geçer bu dünyânun revânı

### 166

1. Sûfi’aceb mi bilmese sayfun safâsını  
Sâfi mey ile pâk idemez sîne pasını
2. ‘Ârif gerek eser kıla âsâr-ı nev-bahâr  
‘Âşık gerek ki anlaya bülbül nidâsını
3. Bâd-ı sabâ meger haber-i dil-güşâ virür  
Kim gonca çâk ider ferahından yakasını
4. Deryâ dilin bilen göricek yaşımı bilür  
Sahrâ-yı gamda gözlerümün mâ-cerâsını
5. Berg-i ümîdi Hamdî yile virmezem ki dost  
Bir dem ola ki yâd ide ben bî-nevâsını

### 167

1. Gözlerün kana şitâb itdügi yâ Rab neyiki  
Öldürüp câna ‘itâb itdügi yâ Rab neyiki

2. Rûz-ı vasla iricek ‘âşık-ı bî-çâre nesîm  
Güneşe ebri hicâb itdüğü yâ Rab neyiki
3. Pây-ı lutfunla gelüp gönlümi ma’ mûr kılan  
Dest-i cevriyle harâb itdüğü yâ Rab neyiki
4. Bülbülü gülşen-i kûyında mukîm eylemeyen  
Menzilin cây-ı gurâb itdüğü yâ Rab neyiki
5. Bî-hisâb eyler iken lutfını agyâra habîb  
Bana cevri hisâb itdüğü yâ Rab neyiki
6. Yâr nûş eylese agyâr ile ey Hamdî şarâb  
Dil-i ‘uşşâkı kebâb itdüğü yâ Rab neyiki

### 168

1. Câm-ı vahdet cur’asından her ki hüşyâr olmadı  
Fârîg oldu kayd-ı kesretten giriftâr olmadı
2. Tâc u devlet hil’at-i ‘izzet o tecrîd ehline  
Kim dilinde ragbet-i dîbâ vü destâr olmadı
3. ‘İlm resmi şübhesinden ma’rifet bulmaz kişi  
Merd-i tahkîk ol durur kim ehl-i pindâr olmadı
4. Secde-i sehv ile geçdi ol kişinin ‘ömri kim  
Tâk-ı mihrâbı anun ebrû-yı dildâr olmadı
5. Şehr içinde hoş durur düzdîle ger bed-nâm olam  
Var mı bir ‘âşık ki ol rüsvâ-yı bâzâr olmadı
6. Kûyuna ‘azm idenüsensin murâdı ey sanem  
Hacc-ı dîdâr idenün maksûdı dîvâr olmadı
7. Hamdî`ye ta’n itme ey zâhid hevâ-yı ‘ışk ile  
Kim anun yârı riyâ bâbında zünnâr olmadı

### 169

1. Tâvûs-ı bâg-ı kuds imiş âdem didükleri  
Dâm-ı belâyimiş ana ‘âlem didükleri
2. Seyr eylesem cihânı ser-â-ser bulunmaya  
Âhumdan özge mûnis ü hem-dem didükleri
3. Dil-ber cemâli şevkiyle cân virenlere

Cennet olursa tan mı cehennem didükleri

4. Bu çeşm ü kadd [ü] zülf ü dehân ile ey sanem  
Sensin meger ki var ise ‘âlem didükleri
5. Hamdî cihânda gussa-i yâr ile şâd olur  
Kût-ı revândur ehl-i dile gam didükleri

**170**

1. Bir demde gamundan gönüle vâsıl iki oldu  
Bir sâ’atine ‘ömrümüzün hâsıl iki oldu
2. Nidem ki rakîbünseg-i kûyunla birikdi  
Vasluna ne hîle ola kim hâ’il ikiholdı
3. ‘Âlem dil ü cân gibi sana bende-i hâlis  
Sanma sanemâ ki tapuna mukbil iki oldu
4. Bu gözlerümün yaşını görüp güler ol yâr  
Bir la’li iki etdi meger sâ’il iki oldu
5. Sünbülleri eşkâlini cân hall idemezken  
Dil goncası fikrine düşüp müşkil iki oldu
6. Kûyında gözi sihrini Hamdî görüp eydür  
Dünyâda meger memleket-i Bâbil iki oldu

**171**

1. Diyâr-ı goncadan itdi meger sabâ güzeri  
Ki virdi yine yakası açılmaduk haberi
2. Nişâne virdi nigârün dehânı râzını dil  
Didi bu sırrı bilür her ki hûn ola cigeri
3. Safâ tarîkatinün tıflı olmayan sûfî  
Çeker mi cûy-ı leben hasretinde derd-i seri
4. Zihî meges ki anun himmeti budur kim ire  
O menzile ki yanar Rûh-ı kuds`ünanda peri
5. Giceleri diri tutar bu Hamdî derdün ile  
Ya öldür anı ya hod bu belâdan eyle berî

**172**

1. Her kanda ki hatt-ı taraf-ı la'lün anıldı  
Yâkût ise de hattın ögen yazdı yanıldı
2. Her sâgar-ı zerrîn ki bu dem la'lüni gördi  
Kal'î çanağı gibi ana agzı egildi
3. Âh idi benüm hem-nefesüm ol da tutıldı  
Çengâl olup âh meger bagruma ildi
4. Her kim kaşı mihrâbına secde kıla yârun  
Men kec dimen ol secdeye kim kibleye kıldı
5. 'Uşşâkını koyın gibi ol gamze-i kassâb  
Kırdı o kadar kim bıçağın Hamdî de sildi

### 173

1. İklîm-i 'ışkun ol kişi kim oldı sâhibi  
Sultân-ı 'âlem oldı nider câh u mansıbı
2. Cânâ yüzüne her ki özin nisbet eyleye  
Baş üzre tutar ehl-i nazar anı gül gibi
3. Gün irse hâk-i pâyuna andan güzer kılur  
Bu kîmiyâyı bilmez imiş degme Magribî
4. Bâd ile hem-dem olsa perîşân olur saçun  
Her-câyînün nice olısar pes musâhibi
5. Yâr ile mâ-cerâlarını Hamdî söylese  
Ebter olurdu Vâmık u 'Azrâ menâkıbı

### 174

1. Bagrına basdı gönül tîrünü cânânı gibi  
Sakinur cânı içinde elif-i cânı gibi
2. Görürem dün gece düşümde ölür dîv rakîb  
Vâkı'a olmadı bu vâkı'a şeytânîgibi
3. Yıl olup yiler iken gönlümü sayd itdi lebün  
Yillere hâkim olan mühr-i Süleymânî gibi
4. Nâ-gehân sevdi gönül bir sanem-i sîm-teni  
Ağrı altuna deger büt-i Ken'ânî gibi

5. Göz terâzûsına urur gördüğü her sîm-teni  
Dîde-i Hamdîhüsün cevheri mîzânı gibi

### 175

1. áonce dehen-i dil-bere öykindi güzâfî  
Çok söylemesün agzı büyür yok yire lâfî
2. Gül-reng görünür gözüme tıgı nigârun  
‘Âşık cigerinden gibi üstinde gılâfî
3. ‘Aks-i leb-i dil-ber görünür kanlu gözümde  
Şeffâf zücâc içre nitekim mey-i sâfî
4. Hâzık o tabîb ola ki şerbet sorana ol  
Dildâr lebi gibi cevâbı ola şâfî
5. Derd altına düşdüğüne Hamdî boyı dâl[dur]  
‘Işkına nişân kâmeti lâm oldugı kâfî

### 176

1. Âh kim ol bî-vefâ dil-ber beni yâd eyledi  
Ben garîbi agladup düşmenleri şâd eyledi
2. Hey ne zâlimdür ki vîrân itmeg için gönlümi  
Yine yüz dürlü cefâ resmine bünyâd eyledi
3. Tavrını bilmekde ‘ışkun dil henûz şâgird iken  
Cevrini çekmekde dil-ber bizi üstâd eyledi
4. Çengveş eyle büküldi kâmetüm derd ile kim  
Hâlümü gören kişi ney gibi feryâd eyledi
5. Yine derdiyle diyârından sefer kılmag için  
Hamdî miskîne belâdan ol perî zâd eyledi

### 177

1. Zülfün hevâsı ‘aklumı dîvâne eyledi  
Hüsünün ziyâsı cânımı pervâne eyledi
2. Hûnî gözün nidem ki cefâ leşkerin çeküp  
Cân kışverini zulm ile vîrâne eyledi
3. Her kim safâsın anladı la’lün şarâbınun  
Evrâd-ı subhı na’ra-i mestâne eyledi

4. Kılmadı devr-i çerh-i sitemkâr kimesneye  
Ol cevri [gör]ki cânuma cânâne eyledi
5. Her kim belâ-yı yâr ile olmuşdur âşinâ  
'Îş-i cihânı kendüye bigâne eyledi
6. Sayd eylemege [geldi] gönül murgın ol perî  
Zülfini dâm u benlerini dâne eyledi
7. Top itdi Hamdî başını çevgân-ı zülfine  
Meydân anun ki cünbişi merdâne eyledi

### 178

1. Sevdâ-yı sünbülün beni dîvâne eyledi  
Ma'mûr iken bu 'aklumu vîrâne eyledi
2. Ol dem ki düşdi 'âleme şevkî cemâlünün  
Kimini şem' ü kimini pervâne eyledi
3. Cânâ şarâb-ı 'ışkunı nûş itmek isteyen  
Bagrın kebâb u çeşmini peymâne eyledi
4. Ol cân kuşına dinile himmet hümâsı kim  
Zülfünü âşiyân benüni dâne eyledi
5. Sayd itdi Hamdî gibi nice mübtelâları  
Âhû gözün ki hamle-i şîrâne eyledi

### 179

1. Kara zülfün beni dîvâne kıldı  
Karârum mülkini vîrâne kıldı
2. Seni şem' eyleyen bezm-i ezelden  
Beni şevkun ile pervâne kıldı
3. Şarâb-ı 'ışkuna sad âferîn kim  
Nice mescidleri mey-hâne kıldı
4. Ne âhûdur gözün cânâ 'aceb kim  
Şikâra hamle-i şîrâne kıldı
5. İrişüp yine vaslun ni'metine  
Bu Hamdî cânını şükrâne kıldı



180

1. Efsâne oldu 'âleme çün hüsni âyeti  
Efsûn okıdı dillere zülfi hikâyeti
2. Cân vireyidi haste gönül bin belâyile  
La'li tabîbi kılmasa lutf u himâyeti
3. Zülf-i siyâhı agına hâlin ben eyleyüp  
Sayyâd-ı çeşmi sayd ider ehl-i melâmeti
4. İrse sabâ ta'accüb idüp baş salar çenâr  
Benzer ki ana medh ider ol serv-kâmeti
5. Nâ-dân u dûn olan kişi anlamasun diyü  
Virdi kitâb-ı hüsnine 'ayn-ı sakâmeti
6. Bir âhum ile saldı beni dost fûrkate  
Hoş diyeler ki bâd koparur kıyâmeti
7. Öldürdügince gamzesi Hamdî bulur hayât  
'İşk ehline bes ola bu resme kerâmeti

181

1. Âh kim yakdı beni rûy-ı nigâr ayrılığı  
Ne 'aceb müşkil imiş 'âşıkâ yâr ayrılığı
2. Hasret-i dil-ber ile gönlüm o bustân gibidür  
Kim tarâvet komadı anda bahâr ayrılığı
3. Ayrılık mihneti sabr ile gide dir idüm  
Gönlüme gelmez imiş sabr u karâr ayrılığı
4. Ne belâ oldu bana hasret-i bâlâ-yı habîb  
Ne garîb itdi beni kûy-ı nigâr ayrılığı
5. Hamdî'nün gonca gibi kan ile toldı cigeri  
Hasret-i serv-kad ü lâle-'izâr ayrılığı

182

1. Devrân beni çün sohbet-i cânândan ayırdı  
Ol mürdeye döndüm ki ölüm cândan ayırdı
2. Fûrkatde tenüm derd ile ol mûya dönüpdür

Kim şâne anı zülf-i perîşândan ayırdı

3. Ol yapraga döndürdi beni hasretün ey dost  
Kim bâd-ı hazân anı gülistândan ayırdı
4. Derd ile nice inlemesün haste gönül kim  
Devrân anı la'lün gibi dermândan ayırdı
5. Hamdî yiridür günde eger bin kez ölürse  
Cânın sakınup kendüyi cânândan ayırdı

### 183

1. Cûy-ı eşküm cûşa gelse tan mı deryâlar gibi  
Ser-keş oldı dil-berüm çün serv-i bâlâlar gibi
2. Hey ne fettândur saçı 'ayyârı kim yüz âl ile  
Gösterür şeydâlara kendüyi şeydâlar gibi
3. Âh elinden seg rakîbün kim gelüp her meclise  
Dil-rübâlar ürkidür âhû-yı sahrâlar gibi
4. Gün yüzinden hüsnini gördi meger kim 'andelîb  
Serve çıkup çağırur merd-i temennâlar gibi
5. Kaddüni bâr-ı ta'alluk kılmasun Hamdî dü-tâ  
Gözlerün tâ yek göre kevneyni yek-tâlar gibi

### 184

1. Tâ 'aksini la'lün mey-i hamrâya düşürdi  
'Uşşâkı kamu câm-ı musaffâya düşürdi
2. Tûbî boyunun sâyesi çün düşdi cihâna  
Serv-i çemeni sâye gibi pâya düşürdi
3. Cânâ ne bilür zehr-i gamun zevkını sûfî  
Çün gönlini ol lezzet-i helvâya düşürdi
4. Her kim ki cihân halkını hem-sohbet idindi  
Eyvâh ana kim kendüyi gavgâya düşürdi
5. Ey Hamdîkarâr ide mi dil zevrakı hergiz  
Çün lenger-i tedbîrini deryâya düşürdi

### 185

1. 'Iřk odı ile tâ ki gönül řem'i uyandı  
Pervâne gibi cân u ciger odlara yandı
2. Gül gibi cihân güldi irüp devr-i bahâr[a]  
Benüm yüregüm lâle gibi kana boyandı
3. Âvâre iken gönlümi sayyâd-ı mahabbet  
Sayd eyleyüben boynına hoş takdı kemendi
4. Vâ'iz bize va'z itme ki dîvânelerüz biz  
Bend ehline ger 'âkil isen eyleme pendi
5. Her řâm u seher Hamdî nice inlemesün kim  
Râhat uyudı derd ü gam [u] mihnet uyandı

### 186

1. Gerçi cihân saçundan dâm-ı belâya düşdi  
Kimseye düşmez ol kim ben mübtelâya düşdi
2. 'Âlemde tan mı şevkum gün gibi rûşen olsa  
Mıhr ile çünkü gönlüm sen meh-likâya düşdi
3. âamzen ciger delerken girdi rakîb araya  
Nidem ki kan olısar şeytân araya düşdi
4. Ger dest-gîr olursa 'uşşâka tan mı zülfün  
Miskînlig ile çünkim baş egdi pâya düşdi
5. Hamdî cefâyı hoş gör çün kismet-i ezelde  
'Âşıklarun nasîbi cevır ü cefâya düşdi

### 187

1. Tal'atun şevkı anun kim çeşmine nûr olmadı  
Bir nazardur kim nazar ehline manzûr olmadı
2. Ben nice pinhân idem sînemde hüsünşevkını  
Çün gil ile gün yüzi 'âlemde mestûr olmadı
3. 'Âşık oldur kim anun 'ıřkına yokdur intihâ  
'Ârif oldur kim anun 'irfânı mahsûr olmadı
4. Ol kim engûrun řarâbın nûş idüp ser-mest olur  
Derd dürdin nûş idenler gibi mahmûr olmadı
5. Bu nigâristâna Hamdî ol ki bakmaz nakşıçün  
Matlab-ı a'lâsı anun cennet ü hûr olmadı

188

1. Her ciger-gûşe firâkı yürece döğün kodı  
Eyle yanar her döğünü sanasın bugün kodı
2. Her biri kasr-ı cinâna rihlet itdi şâdmân  
Mihnet ü gussa diyârında bizi mahzûn kodı
3. Her birin sagdı ogul balı gibi aldı ecel  
Âh dūdından yirinde bir kara tütün kodı

189

1. Kim ola ‘âşık-ı miskîne şefkat eylemeye  
Figân u nâlesini göre rikkat eylemeye
2. Cihânda âdem olan görse ‘ışk hastesini  
‘Îlâcın itmez ise bârî zahmet eylemeye
3. O kim rakîb olup ehl-i ‘ışka zahmet ider  
‘Aceb degül ki Hudâ ana rahmet eylemeye

190

Muhtasardur sözümler egerçi velî  
Pür-şekerdür dehân-ı yâr gibi  
Hamdî medh itme sözlerini sakın  
Sen de [şol] ehl-i iftihâr gibi

191

Şu’arâ-yı zamânenün varı  
Birbirinden ugurlar eş’ârı  
‘Aybdur bu didüm birine didi  
Zî-hüner cerr iderse cerrârı

192

‘Âdet budur ki her gazelün penc beyti olur  
Cehd id ki Hamdî her birisi Penc-Genc ola

193

Varlıg anun ki varı terk itdi  
Dost gönlin gönülde berk itdi

194

Bu 'âlemde kimesne gamsuz olmaz  
Eger olsa benî âdem degüldür

195

Ol Hamdî`yem ki zerre-i Şems-i velâyetem  
Enfâsum ile 'âtıradur nefis-i tayyibe

196

Te'sîr ideli cevherine kîmyâ-yı 'ışk  
Sîmâsı Hamdî`nün zere benzer bi-'aynihi

197

1. Şu dil-ber kim anun adı Sefer`dür  
Sakardan kıt'a-i tâb-ı şererdür  
Anı sevmek belâ-yı derd-i serdür  
Sefer zîrâ ki pür-havf u hatardur
2. Sefer gâyet belâdur serd olıcak  
Seferden merd usanmaz derd olıcak  
Sefer hoşdur müsâfir merd olıcak  
Sefer görmüş belâ-perverd olıcak
3. Ne hoşdur nev-bahâr olmak seferde  
Nazargeh lâlezâr olmak seferde  
Bile derd ehli yâr olmak seferde  
Safâlar bî-şümâr olmak seferde
4. Çekersin şiddet ey hâcî seferden  
Ne lezzet bulunur acı seferden  
Eger Türk almasa bâcı seferden  
Usandurmazdı huccâcı seferden
5. Mübârekdür sefer terk itme anı  
Mukîme eksük olmaz armaganı  
Kılur hem puhte hâm olsa cüvânı

Cüvâna öğredür sûd u ziyânı

6. Belâ-yı fûrkate mâye Sefer`dür  
Belâ olan ser ü pâya Sefer`dür  
Viren eksüklüğün aya Sefer`dür  
Düşüren halkı gavgâya Sefer`dür
7. Sefer olsa yaraşu[r] ni`met ile  
Sefer âteşdür olsa mihnet ile  
Sefer cân lezzetidür râhat ile  
Bir iki ehl-i dil hem-sohbet ile

**198**

Hammâmına bârid dir idüm Göynükün ammâ  
Hammâmcısını gördüm ü hammâma ısındum

**199**

Cihân bir bâgdur âdem yimişi  
Sen ol yemişler içinde eriksin